


陝西通志



第三十九卷

水利一

圖考

DS  
793  
S4585  
1735  
V.39








陝西通志第三十九卷

水利一

禹功稷教盡力澮溝矧茲沃野涇渭交流鄭白疏鑿畝鍾石收羨  
陂宋泊繼此講求千渠百堰灌溉盈疇雨露天降桔槔人謀曷若  
引導膏澤有秋烝民乃粒萬世綢繆作水利志第十七

按秦地據百川上流導引甚易八水廻環於豐鎬百泉噴湧於  
邠岐延綏地處邊陲猶擅榆溪之利褒沔夙稱澤國更資江漢  
之波雍州所稱厥田上上而爲陸海也明叅政劉麟云陝西無  
地不可興水利殆非虛語然利澤可資蓄洩宜備則順水性相  
土宜均門斗堅堤堰俾民永享樂利豈非良牧責哉茲者仰體  
皇仁勤思民事凡渠泉之可利田疇者悉爲派別支分繪圖立說誠  
使流通者灌溉優渥而堙廢者亦漸次興脩是則撰述之意也








# 西安府龍首通濟兩渠圖






















西華縣志卷之二十一

澧水澇水渠圖












龍洞渠圖




































# 石川金定水渠圖




















渭水渠圖








寶雞縣河水渠




鄒縣渠圖  
 卷之三  
 三

# 鄒縣渠圖









山河堰圖

徐家渠

楊坪渠

南低中溝渠

北高坡洞渠

十中溝渠

麻子溝渠

北高溝渠

任明洞

任朝飲洞

吳剛洞

東柳葉洞

高洞子

何棋洞

花家洞

郭家洞

陳定洞

康本洞

大玉官洞

小玉官洞

高橋洞

李官洞

李唐洞


北溝渠

中溝


平南溝

江漢

















廉水渠圖










漢濱溢水渠圖











壩水渠圖

倪家渠 魏家渠










沙河堰圖











沔縣渠圖










西鄉渠圖










興安州渠圖










洵陽縣水渠圖











石泉縣水渠圖










漢陰縣水渠圖









山陽渠圖










商南渠圖















濠水渠圖







邵陽澄城二縣渠圖







華州水渠圖

渭河

王裏渡

太平橋

羅紋橋

水產壩

袁溪

黃家河

蓮花池

下水峪水渠

移山潭

疏水河

南溪


太白峪

小寨峪

白崖峪







# 華陰渠圖


陽西通志

卷三十九




三





分州三水渠圖







古涇渠圖

清治濁水附

石川河








古石川渠圖







# 關中古渠圖





上林苑入渭則是北流而非東注矣竊疑澧水之澧澧東之鎬澧霸澧禹時悉合澧以入渭故澧水得成其大禹導渭東會于澧當在漢霸陵縣北霸澧入渭處也若渭北之水為鄭白所亂古未有此二渠漆沮合流至櫟陽入渭不與洛相通故視澧為小今鄭渠既廢而濁水絕於三原沮水不入富平可見二渠水開時漆沮原不合洛其入渭處即今石川河是也



自秦漢以來渭北有鄭國渠白渠六輔渠成國渠漳渠蒙龍渠龍首渠渭南有豐軹渠昆明渠漕渠皆鑿引諸川之水為之

西安府長安縣

太平峪水渠 在縣西南四十里水自鄠縣來至南郭村入縣界

分三派灌田三百餘畝

縣冊

草堂堰 在縣西南六十里引高官峪水在西岸開渠灌田二百餘畝峪水又東北流爲

蕭家堰 灌田三百餘畝峪水又東北流爲

新渠 灌田一百餘畝其在東岸開渠者爲

陳家渠 灌田一百餘畝

縣冊

高橋渠 一名韓家庄渠在縣西四十里引豐河水經流馬池頭

槽房裏東西馬房至咸陽梁家庄入渭灌田二十餘畝豐水又

北流一里許爲

閻家古渠 經流席家村張家庄馬家村又自北而東仍入豐河



渠西席家等村灌田千餘畝渠東党家橋等處灌田五百餘畝  
縣冊

金家堰 在縣南五十里引鎬水即石鰲峪水也峪水出峪口北  
流經過咸寧王渠鎮入縣界在西岸首為金家堰經流曹村水  
寨兒等處灌田五百餘畝河水又北流里許為

校尉渠 灌田九百八十畝河水又折而正西流南岸掘引灌田  
者有

高渠 灌田二百畝河水又西為

吳家渠 灌田六十三畝又西為

劉家渠 灌田七十畝又西為

孟家渠 灌田三十畝又西為

張家渠 灌田三十畝又西為

梁家渠

灌田三十五畝其北岸則首

唐家渠

灌田七十畝次

田家渠

灌田六十五畝次

楊家渠

灌田二十畝河水又西過夾肋村爲

馬家渠

灌田七十畝河水又西至香積寺爲

頭道渠

灌田五十畝又西爲

二道渠

灌田三十畝河水又西合滴水爲東交河

縣冊

碌軸堰

在縣南二十里水磨堡滴水河北岸砌碌軸爲堰堰滴水

北流復由東北轉西南七折兩岸共灌稻田八十餘畝下流入

於皂皂河源出大義峪第三派水經流咸寧義峪里會阿谷泉

又西北流至木塔里會碌軸堰水又西流過杜城南又西流至

沈家橋又西流至丈八溝立閘至閘口放水南下復自西折而



北流者爲皂河正身經漢故城入渭下流今淤自開口逼水北  
上者爲

通濟渠

水自閘北西行二里許折而北流過丈八頭小石橋又  
北至南窪頭皆係地渠又北過甘家寨轉東北流過糜家橋又  
北至解家村又北至外城郭俱係土堤高一丈二三尺濶倍之  
又轉東至安定門吊橋邊自閘口至此凡二十六里由洞口入  
甕城內南流由水門出甕城外沿城而南過一敵樓復入城東  
南流至白路灣折而東北流至牌樓南又正東流入地下磚渠  
分三派一從長安縣東流過廣濟街又東過大菜市真武菴流  
出城注于東城壕今自廣濟街以東淤塞一從廣濟街北流過  
鐘樓折而西過永豐倉前入貢院現今流通一從廣濟街直北  
過麻家十字街口匯入蓮花池今淤縣陝西爲西北巨藩西安



府印宋永興軍大中祥符間知永興軍陳堯咨嘗引龍首渠水自城東入以便人用堤倚高原日見削損城中軍民爭汲汰清然後可用能望其環城而為金湯之固耶成化改元予忝巡撫父老詣予言曰去城西南十五里地名丈八溝俗名交皂二河

○按丈八溝乃皂水立閘處今並言交河者緣碌軸堰堰滴水入皂滴水下流一名交河也

若能疏導自西

入城人用之餘可泄之池以環厥城再餘泄經九龍池入於澧

予聞而相視原隰其實疏聞上可其奏用是工役蝟攢畚鍤雲

集地之高者則掘而戕渠地之卑者則築而起堰不三旬水遽

入城命名曰通濟渠

巡撫項忠通濟渠記

通濟渠水出咸寧縣大義峪正

派合小義峪炭峪之水為滴河即交河支派第一派為龍首渠

○此派東北流

第二派無名第三派為胡公堰乃按察司胡公所作引

水經流咸寧義峪里與阿谷泉合流為皂河經流韋兆里韋村



里社楊里高望里韋曲里長安縣塔坡里社城里沈橋里木塔里至地名丈八頭作閘引水入西安府西城壕為通濟渠余子俊通

濟渠記通濟渠乃兵部尚書余公子俊為西安知府時於城化初

因龍首渠水不足用訪得義峪等河水經杜曲御宿川等處至丈八頭入皂河乃於丈八頭造一石閘穿渠引水西流至郭村轉東築堤為渠其渠自西關入城用磚甃砌一千五百五十丈甃未周處亦有損壞都御史周公季麟檄西安知府馬炳然相度議處於余公甃砌未周處以磚甃砌七百二十丈城外土渠亦疏濬修築二十五里王恕通濟渠記明末渠堙不通

本朝康熙三年巡撫賈公漢復修築至六年復修渠水流通迄為

永利縣志

古渠漆渠在縣西南二十里舊自坑河分水經縣界二十里入



漕河漢書曰穿此渠通漆水故曰漆渠括地志曰胡亥築阿房

宮開此渠而運南山之漆

宋敏求長安志

今豐河東岸普濟橋下直北

十餘里逕漢城西渠形猶存蓋即漆渠入渭處也

縣冊

○石闐堰

在縣西南三十二里水經注曰交水西至石碣漢穿昆明池所

造

宋敏求長安志

武帝作石闐堰堰交水為池昆明基高故其下流尚

可壅激為都城之用於是並疏列三派

○三派即下昆明故渠明渠碣水陂也

城

內外皆賴之唐太和後石闐堰廢而昆明池涸

胡氏鑑注

○昆明故

渠在縣西南

古渠圖

昆明故渠上承昆明池東口東逕河池北亦

曰女觀陂又東合沈水亦曰漕渠又東逕長安縣南舊引水為

辟雍處在鼎路門東南七里又東而北屈逕青門外與沈水枝

渠會

此渠即明渠

分為二渠一水逕楊橋下即青門橋也側城北逕

鄧艾祠西而北注渭今無水其一渠東逕奉明縣

水經注○下別見咸寧



○明渠在縣西北即王渠一名明渠古渠圖哀帝為董賢治大第開門

向北闕引王渠灌園地漢書董賢傳沈水枝渠上承沈水於章門西

飛渠入城東為倉池又東逕未央宮北北即桂宮渠出二宮之

間謂之明渠又東歷武庫北又東逕漢高祖長樂宮北又東出

城分為二渠即漢書所謂王渠也此渠出城即蘇林曰王渠王

宮家渠也猶今御溝矣晉灼曰渠名也在城東霸城門外水經

○竭水陂在縣西古渠圖昆明渠水東北流注竭水陂陂水北出

逕漢武帝建章宮東於鳳闕南東注沈水又北逕鳳闕東沈水

又北分為二水一水東北流○據長安圖經此東北流者即飛渠入城之水一水北逕

神明臺東又逕漸臺東又北流注渭水經未央據龍首山為基

本高四十丈故未央殿皆出長安城上其為地既高安所得水

為巨浸凡漢城之水皆取於昆明池而昆明之水自沈水以及



樊杜諸水武帝皆堰壅入池水之既池而又北出也其下口醜  
為三渠以並城而行其先分一派自西而東橫亘城南之鼎路  
門已而東折以注青門水經謂之漕渠呂圖亦具著渠跡暨至  
清明門外合王渠以入於渭第二枝自都城西面南來第一門  
名章門者於其旁設為飛渠○飛渠據雍錄言明渠入城必有  
窪下之地中斷不接故架空設槽  
為渠使得超窪東向入城注於未央宮之西以為大池是名滄  
池此池之中有漸臺則未央漸臺也已而滄池下流循殿之北  
向東而往逕石渠天祿閣桂宮北宮長樂宮皆用此水也未央  
地勢甚高而此渠能自西轉北以行是行乎未央山背窪下之  
處也滄池下流有石渠者礪石為之以導此水自此以往水既  
周遍諸宮自清明門出城是為王渠王渠至清明門外與漕渠  
合而北入渭也第三枝則竭水陂自南而北徑趨建章先為唐



中池周迴十里已而從東宮轉北則為太液池其中又有漸臺

即建章宮漸臺也漸臺下流入渭

錄

○漕渠在縣南又東入咸

寧界

古渠圖

元光中鄭當時為大農言曰異時關東漕粟從渭中

上度六月而罷而漕水道九百餘里時有難處引渭穿渠起長

安並南山下至河三百餘里徑易漕度可令三月罷而渠下民

田萬餘頃又可得溉田天子以為然令齊人水工徐伯表悉

發卒數萬人穿漕渠三歲而通通以漕大便利其後漕稍多而

渠下之民頗得以溉田矣

史記河渠書

元光六年穿漕渠通渭

漢書武帝

紀

漕渠漢大司農鄭當時所開也以渭難漕命齊水工徐伯發

卒穿渠引渭今源自昆明池南傍山原東至於河且田且漕大

以為便

水經注

開皇元年徵郭衍為開漕渠大監部率水工鑿渠

引渭水經大興城北東至潼關漕運四百餘里關內賴之名富



民渠

隋書郭衍傳一作富人渠

開皇四年六月自渭運門以通運九月幸霸

水觀漕渠

隋書文帝紀

開皇四年宇文愷鑿渠引渭水自大興城東

至潼關三百里名廣通渠漕運通利關內賴之

隋書食貨志

永通渠

隋開皇四年開起縣西北渭水與成堰

興成堰見咸陽縣志

初名富渠仁

壽年改

宋徽求長安志

天寶三年左常侍兼陝州刺史韋堅開漕河自

苑西引渭水因古渠至華陰入渭名曰廣運潭灞澧二水會於

漕渠每夏大雨輒漲大曆之後漸不通舟

元和志

天寶二年京兆

尹韓朝宗引渭水入金光門以貯材木大曆元年京兆尹黎幹

自南山開漕渠抵景風延喜門入苑以漕薪炭

唐書地理志

永泰二

年

○即大曆元年也

七月鑿運木渠自京兆府直東至薦福寺東街北

至國子監東至子城東街正北逾景風門延喜門入於苑濶八

尺深丈餘京兆尹黎幹奏

唐會要

京師苦樵薪乏黎幹度開漕渠



興南山谷口尾入于苑以便載運

唐書黎幹傳

○永安渠在縣南引

交水西北入城逕西市入苑沈水自南入焉有福堰分為二水

流一里一水合交水一水西北流又東為瀆越沈水上過又名

永安瀆入苑注渭○西街永安渠隋開皇三年引交水西北流

入城自大安坊經大通信義永安延福崇賢延康六坊之西又

經西市之東又北流經布政頌政輔興崇德四坊及興福寺之

西又北流入芳林園又北流入苑注之於渭

宋敏求長安志

開皇開永

安渠後交水沈水始入城入苑不與漢世流派相應蓋皆有堰

壩之類壓而入之

雍錄○漢時皆西流然後北折此則徑從西北入城

元和八年四月發

神策軍士修城南交渠

會要○按長安縣志有香積渠隋開皇三年築引交水自赤欄橋經第五橋西

北入城今考其地應即永安渠也

○清明渠東南自萬年縣界流入西北流又

屈而東北入宮城○東街清明渠開皇初引沈水西北流屈而



東北流入城當大安坊南街又屈而東流至安樂坊之西南隅  
屈而北流經安樂昌明豐安宣義懷真崇德興化通義太平九  
坊之西又北流經布政坊之東右金吾衛之東南屈而東南流  
入皇城經大社北又東至含光門街又屈而北流經尚食局東  
又北流經將作監內侍省東又北流入宮城宋敏求長安志○清渠在  
縣西五十里自鄠縣界來經縣界十里注渭宋敏求長安志○  
見十道志至德二載郭子儀與賊戰于清渠唐書肅宗紀○按郭子  
儀傳子儀率師趨長安次濁水上賊安忠軍清渠左大戰則清渠乃近長安或以為涇陽之清渠者誤也○豐河渠在縣西南

四十里

賈志

豐水渠今名賀蘭渠東北流注交水溉田一萬餘畝

括地志

豐河渠自鄠縣流入今東岸斗門鎮北有渠逕馮三村馮

黨村田村陶家莊許村喇家村又北合漉池俗名張王渠渠迹  
雖存堙廢日久



本朝康熙六十年居民自陶家莊開渠引水過許村北屈而東北  
流過喇家村合漉池水又北流二里退入漆渠故道又北注於  
渭渠長九里堰口高三丈寬五尺傍渠田地因勢穿溉頗獲其  
利後因大雨豐水衝決渠復堙塞不通今許村佛寺有碑記其

事

縣志

○國州渠灌田一百餘畝

縣志

今無考

縣志

### 咸寧縣

### 龍首渠

在府城東南

賈志

永嘉坊有龍首渠一名漚水渠隋開皇

初自東南龍首堰下支分漚水北流至長樂坡西北分為二渠

東渠北流入苑西渠屈而西南流經通化門南西流入城逕此

坊

即永嘉坊

又西南流逕興慶宮又西流經勝業坊崇仁坊景龍觀

又西入皇城經少府監大僕寺內坊之西又北流出城○萬年

龍首渠史記曰穿渠得龍骨故名自萬年縣界龍首鄉馬頭控



堰漚水入此渠又西入長安縣界

宋敏求長安志

長安志於萬年縣既

注龍首渠曰一名漚水渠因引史記曰穿渠得龍骨誤也龍首

渠漢武帝所穿在同州因穿地得龍骨故名雍居渭南同居渭

北無由合為一而漚之一水史漢皆嘗志之不云得龍骨也兩

京道里記云龍首渠開皇三年開引漚水北流入苑在長樂坡

上堰近龍首即大明宮所據龍首原也故以名之此說是也王

應麟曰唐時導水入城有三一曰龍首渠二曰永安渠三曰清

明渠

按清明永安二渠別見長安縣

龍首渠自城東南導漚至長樂坡分為二

渠一北流入苑一經通化門興慶宮自皇城入太極宮及至大

明宮則在龍首山水不可導矣大明宮之東有東苑即在龍首

山盡處地既低下故東苑中有龍首池言其資龍首渠水以灌

溉也

雍錄

龍首渠隋開皇初堰漚水西北至大興城東南入城唐



因隋渠道漑水分爲二渠一西入通化門西南入南內興慶宮

景龍池又西入西內太極宮一北入東苑至龍首殿爲龍首池

又注凝碧積翠二池又西北入大明宮後灌太液池五季後渠

涸縣志大中祥符七年陳堯咨知府事以城內井泉大半鹹苦乃

相度城東二里之龍首渠其水清冷甘冽可五六十丈開引入

城散流屢開民咸賴之宋史河渠志○按隋唐分東西二渠宋止修西渠故道東渠堙廢陝西

龍首渠始鑿於隋初引漑河水經倪家村龍王廟滴水崖老虎

窰九龍池至長樂門入城分作三渠一從元真觀南流轉羊市

過咸寧縣總府西流轉北過馬巷口一從真武庵北流一從羊

市分流過書院坊西入秦府成化間雖有人修濬惟總府前二

十丈有磚甃砌餘皆土渠用板木棚蓋以土覆之常有損壞巡

撫周公季麟檄西安知府馬炳然修理東關廂及城中三渠俱



用磚甃砌城外申家溝等處造橋架槽引水入渠遂免衝激之

患又將城外土渠六十里亦疏濬深濶築岸高厚以防走泄

王恕

修渠記 澧水源出藍田西界入縣境合採峪庫峪荆峪及大義峪

第一派之水北流至留空於西岸築堰西至亭子頭皆鑿原穿洞而過又西流逕申家灣田家灣又西流十里入城分三派一經流郃陽府前至西分一渠經流大菜市往北入臨潼府一經流京兆驛並永興府至西轉北經馬巷口入蓮花池

本朝康熙初巡撫賈漢復與通濟渠並加疏濬今惟上流甫高村江村等處灌田四百畝至亭子頭以下入城舊道堙塞不通

縣冊

澧水又北流至田家灣爲

田家灣渠 灌田一百畝又下爲

史家灣渠 灌田九十畝又北流入灞

縣冊



宋家渠 在縣東二十里潮水來自藍田至新街子入縣境引灌  
灌溉首爲宋家渠灌東留村田六十畝稍下爲

洪河渠 今涸又下爲

王家渠 灌東留村田七十畝又下爲

胡家渠 灌方家村田六十畝又下爲

曹家堰 灌下留村田五十畝又下爲

上堰渠 灌下留村田五十畝又下爲

中堰渠 灌下留村田七十畝

縣冊

東堰渠 在縣南五十里引石鰲峪水即鎬水也一名大瓢河出

峪口直北流東岸爲東堰渠灌田一百畝西爲

西碌軸堰 灌田三十畝又下爲

李家堰 灌田二十畝河水又北流十二里至王渠鎮西岸爲

連江渠

灌田一百五十畝又下爲

西官渠

灌田二百三十畝東岸有

大磨渠

灌田一百八十餘畝又下爲

小磨渠

灌田七十畝又東有

河東偏堰

灌田三十畝河水又北至皇甫村折而西南岸有

寨嶺堰

灌田一百四十畝稍下爲

董劉堰

灌田六十畝又下爲

楊家堰

灌田二百畝又下爲

高家堰

灌田二百二十畝河水又西流入長安界

縣冊

趙家渠

在縣南五十里大義峪水分三派第一派與狗枷荆溪

庫峪採峪諸水合流爲澮即龍首渠之源也第三派爲胡公堰

與阿姑泉合流爲皂即通濟渠之源也第二派無名其水自東



而西兩岸皆可灌溉南岸首爲趙家渠灌王莽村田四十畝又西十里至江村爲

王家堰 灌田千餘畝又西至張義村爲

賈家堰 灌田二百畝又西至樊村爲

洪夫官堰 灌樊村田三百畝又西至師家村爲

師家堰 灌田一百畝又西過盧家堡爲

王家堰 灌田八十畝又西至岳村爲

柳巷堰 灌田二百畝又西爲

新渠 灌田八十畝又西至劉思村爲

白沙渠 灌田五十五畝又西至小張村爲

渭渠 灌田一百八十畝又下爲

官堰 灌田一百三十畝又稍下爲

楊家堰

灌田五十畝又稍下爲

白家堰

灌田六十畝又西流至瓜張村爲

郭家堰

灌田九十畝其在北岸者首爲

路家堰

灌關家村田七十畝河水又西爲

關家堰

灌關家村田七十畝河水又西至東江坡爲

姚家堰

灌田一百畝河水又西至樊村爲

李家堰

灌田三百畝河水又西入灃水

縣冊

翁家渠

在縣南六十里水源出南山白道峪東直北流出峪口

灌田六十畝伏入地內至申店又出居民引流灌田一百三十

畝下流入於灃

縣冊

沐峪溝渠

在縣南五十里沐峪水來自藍田界入縣境灌侯村

田一百五十畝

縣冊



荆谷溝渠

在縣南二十五里荆峪水來自藍田界自高橋入縣

境灌田五十畝

縣冊

海子

在縣東南六十里採庫二峪水入縣境合流聚為深潭俗

名海子居民導引灌田四百畝

縣冊

鍾家堰

在縣南六十里有泉八眼灌田四十畝相近有

白沙泉

灌田四畝

縣冊

阿翁泉

在縣南金巒坡下灌田四十畝

縣冊

腰泉

在縣南朱家坡下灌田一百七十畝

縣冊

老官泉

在縣南四府堡灌田一百五十畝

縣冊

雙猪扁泉

在縣南二十五里灌田六十畝

縣冊

年兒渠

城南鎬旁濬岸地勢低下隨地挖掘皆有水可資灌漑

其在餘兆村者為年兒渠灌田二百三十畝其在余村者為



木槽堰

灌田八十畝其在楊村者為

邢家堰

灌田六十五畝其在西江坡者亦名

邢家堰

灌田四十畝其在四坡底者為

馬道堰

灌田三百畝其在楊安坡者為

侯家堰

灌田一百畝相近有

安家堰

灌田八十畝其在徐家寨者為

徐家堰

灌田二百畝其在新村者為

連家堰

灌田一百三十畝其在杜曲者為

過街堰

灌田六十畝又稍下有

余渠堰

灌田八十畝每逢雨足則退水入瀘河

縣冊○按縣東瀘河之隈居民

亦隨地掘水灌田但旋掘旋廢無一定名目且所灌甚微故不載入

灞堤

在東二十里

縣冊

灞東灞北嘗被水患修堤數重每山水暴



發決堤衝潰渰沒至十數村康熙二年知縣黃家鼎相地勢因

舊地令民間以甕貯土掘沙易石其堤始固至今享安瀾焉

古渠漕渠在縣南自長安縣流入又東流入臨潼界古渠○王

渠在縣東北自長安縣流入古渠王渠出城東徑奉明縣廣城

鄉之廣明苑南又東北逕漢太尉夏侯嬰冢又北分為二渠一

水逕虎圈南而北入霸一水北合渭今無水水經○通善坊有

杏園黃渠○萬年縣黃渠自義峪口分水入此渠一東北流入

庫谷一西流入樊川灌溉稻田又西入坑河宋敏求長安志黃渠水入

蓬山曲江文宗大和九年發左右神策軍淘曲江先是鄭注言

秦中有災宜以土功厭勝之帝又曾讀杜甫詩曰江頭宮殿鎖

千門遂思復昇平故事此地都在都城中固為空隙然亦緣黃渠

可引故遊觀者樂之也雍錄黃渠自義谷堰水至杜陵南分為二



渠一灌鮑陂一北流十里入曲江今廢縣志今韋曲里高望里東

南即唐黃渠轉東投北注曲江之處縣志○暖泉在縣南可資灌

溉西安府志今湮廢無考縣志

咸陽縣

東泉 在縣西十里俗名東泉頭引泉水灌田二百五十餘畝縣志

西泉 在縣西十五里俗名西泉頭引泉水灌田二百七十五畝

縣志

馬跑泉 在縣西平地湧出與李村泉合流又相近有下村泉三

泉共灌田八百七十餘畝若因泉脉開鑿則得泉必多益資灌

溉縣志

古渠漆渠在縣西南自盤屋縣流入又東入長安縣界古渠

成國渠在縣北縣志成國故渠又東逕茂陵縣故城南又東逕龍



泉北又東逕姜原北又東逕平陵縣故城南又東逕漢魏其侯

竇嬰冢南又東逕成帝延陵南又東逕渭陵南入東逕哀帝義

陵南又逕惠帝安陵南又東逕渭城北又東逕長陵南又東逕

漢丞相周勃冢南又東南逕漢景帝陵又東南注於渭水經注○

昇原渠在縣西北自興平縣流入縣界合成國渠入渭古渠圖○

興成堰在縣西十八里宋敏求長安志天寶元年長安令韋堅為水陸

轉運使治漢隋運渠起關門抵長安通山東租賦於咸陽擁渭

水作興成堰絕灞澹水傍渭東注至關西永豐倉下與渭合太

和初歲旱河涸掊沙而進米多耗抵死甚眾秦漢時故漕興成

堰東達永豐倉咸陽令韓遼請疏之自咸陽抵潼關三百里可

以罷車輓之勞堰成關中賴其利唐書食貨志李石奏咸陽令韓遼

治興成渠渠當咸陽之右十八里東抵永豐倉渠成起咸陽抵



潼關三百里無車輓勞轅下牛盡可耕永利秦中矣李固言曰

役非時帝曰以陰陽拘忌乎苟利于民吾奚慮哉唐書李石傳興成

堰即漕渠上源東流入長安縣界○清渠在縣東自興平縣流

入縣界入渭古渠圖今皆無灌溉利縣冊

按縣志云咸陽居豐渭之滙易於衝決不敢開河放水故修築

渠堰為功頗難惟沿河掘井稍稍濟旱或灌園蔬然桔槔之用

力甚勞而利甚細留心民事者不可不知

### 興平縣

湯臺泉 在縣西十里東南流分東西兩派灌田四十餘畝縣冊

東板橋泉 在縣西二十里縣圖居民引流灌田百餘畝又相近有

西泉 在縣西二十里縣圖居民引流灌田二百畝縣冊槐里縣有板

橋泉魏書地形志



馬嵬泉 在縣西三十里灌田四百餘畝

縣志

史家泉

在縣西三十五里東西分流灌地三十餘畝

縣志

〔古渠〕

成國渠在縣北一里西自武功界流入縣界凡六十里溉

田二百四十餘頃又東流入咸陽界即古白渠也

長安志

成國故

渠逕槐里縣北又東逕漢武帝茂陵南又東逕茂陵縣故城南

又東逕龍泉北又東逕姜原北

水經注

○昇原渠在縣南十五里

西自武功縣流入縣界凡六十里溉田七十餘頃在六門堰東

合成國渠東流入咸陽

○按六門堰乃武功興平二縣界

○普濟渠在縣南一

十里自武功縣流入縣界凡六十里溉田七十餘頃○清渠在

縣南二里東流入咸陽界

按縣志清渠引縣南清水

○百頃泊在縣西二十

五里周一十六里宋泊在縣西二十里周十四里曲泊在縣西

南十五里百頃泊而下並有蒲魚之利邑人利焉隋開皇十三



年各築堤防護

宋敏求長安志

諸泊皆渭水所溢今俱廢

縣志

○清水泉

在縣西南二十五里順治十五年知縣徐開熙開清流蕩漾灌

溉七村時典史洪廷憲同事因名徐洪泉又名永濟泉

縣志

西

南胡浹橋向有泉灌溉一方其源久塞莫知年所成戊孟夏禾

苗焦枯邑侯徐公率眾開濬灌溉亘十里

楊方隆永濟泉記

泉有八但

雨則潦晴則涸無益灌溉

縣志

○朱章堤在縣東十五里西吳村

知縣朱文修嘉靖二十四年知縣章評又修故名

縣志

西吳村地

近北原每遇久雨則北原之水皆匯聚於村旁大為民累是以

築堤捍禦今原上田塍開闢水皆四散而堤亦廢

縣志

臨潼縣

洪沙渠

在縣北六十里自三原高家堡分中白渠水東流入縣

境至吳家堡注於清河其正流之



中白渠 自高陵常家村入縣界又東南流至交口入渭縣志白渠

尾入櫟陽漢書溝洫志白渠東南逕藕原下逕鄠縣故城北東南入

渭今無水白渠又東枝渠出焉東南逕高陵縣故城北又東逕

櫟陽城北水經注中白渠斗七宋敏求長安志其自中白支分東北流之

中南渠 自高陵白家堡東入縣境又東南流至任家堡入渭縣志

中南渠斗七宋敏求長安志其自中南支分之

析波渠 舊亦在縣境入渭今廢縣志析波渠斗二宋敏求長安志其自中

南支分之

昌連渠 自高陵郭橋村入縣境注渭今渠流微細至高陵縣墨

張村止縣志其自中南支分之

高望渠 自高陵樊家莊入縣境至雷家堡注渭縣志高望渠斗二

宋敏求長安志其自中南支分之



禍南渠 昔亦經縣境入渭今渭河衝徙奉政原高水不能進在

高陵船張村入渭不復經縣界矣縣志禍南渠斗一宋敏求長安志○按長安

志云五渠水自洪門入高陵北下並入渭水今據冊報中白中

南昌連高望俱入渭惟洪沙渠入清蓋洪沙係後人新開之渠

不在長安志五渠之內也又縣冊言臨潼處諸渠下流得水

頗艱凡傍渠田地灌溉無多亦無修渠利夫故未著畝數

古渠漕渠在縣北自咸寧流入又東流入渭南界古渠○清渠

在縣西清冶峪水下流自三原高陵界來入白渠至縣界入渭

能及遂引石川河逕斷原東過白渠西南以溉其地長安志石川

河渠名寇公渠自富平遶斷原而南蓋萊公堰漆沮以溉田者

也殘碑今尚存縣志

高陵縣 彭城閘 來自涇陽縣中限中白渠東流二十里入縣界為彭城



閘在縣西北三十里今閘址猶存

縣志

涇水東行注白渠醜而

三以沃關中按部式決洩有時畎澮有度居上游者不得壅泉而湍其腴每歲少尹一人行視以誅不式兵興以還浸失本根涇陽人壅而專之私開四寶澤不及下涇田獨肥他邑為枯地力既移地征如初又或赴訴泣迎尹馬而占涇之家類皆權倖訴者復得罪由是咋舌不敢言長慶三年高陵令劉君勵精吏治乃以新意請更水道入於我里請杜私竇使無棄流請遵舊令使無越制別白纖悉列上便宜掾史依違不決居三載距寶曆元年鄭覃為京兆秋九月始具以聞事下丞相御史御史屬元谷竇司察視持詔書詣渠上盡得利病還奏上以谷奉使有狀乃俾太常選日京兆下其符司錄姚庚士曹掾李紹實成之縣主簿談儒直竇董之揆功十七八而涇陽人以奇計賂術士



上言白渠下有高祖故墅不宜以畚鍤近阡陌上聞命京兆立  
止君詣府控告具發其以賂致前事又謁丞相丞相彭原公即  
入言上前翌日詔許訖役仲冬新渠成季冬新堰成名渠曰劉  
公渠名堰曰彭城堰按股引而東千七百步其廣四尋而深半之  
仍歲旱沴而渠下獨有秋渠成之明年涇陽三原二邑中擁其  
衝為七堰以析水勢使下流不厚君詣京兆索言之府命從事  
蘇特至水濱盡撤不當擁者由是邑人長享其利劉君諱仁師  
字行輿彭城人劉禹錫碑記高陵有白渠寶曆元年縣令劉仁師請  
更水道渠成名曰劉公渠新堰成名曰彭城堰唐書地理志白渠自  
涇陽縣三限下中限為一渠流至縣界彭城堰下分為四渠並

溉民田

宋敏求長安志

自彭城閘北分水者曰

中白渠

在縣西北三十里

縣志

白渠枝渠逕高陵縣故城北

水經注



中白渠東西長三十五里宋敏求自彭城閘北限分水東流至

西王村入三原官村至高家堡支分為洪沙渠入臨潼其正流

復由官村入縣境常家村又東亦入臨潼界舊從北岸支分有

寧玉渠 今廢渠南岸為小王斗生王西斗生王東斗廣利斗西

灣斗高渠斗河村斗馬家斗武家斗石張斗張月斗北岸有雷

家斗韓家斗灣裡斗張流斗東灣斗馬家斗袁盛斗陳義斗董

家斗程家斗孟家斗灌田一千五百四十畝縣冊中白渠斗門二

十三長安圖說○按今祇二十二斗彭城閘南曰

中南渠 在縣西北三十里縣志中南渠東西長三十五里宋敏求

自彭城閘南限分水東南流至磨子橋○磨子橋至閘口五里乃中南與高望渠南分

水南岸有劉金斗杜家斗墨毛斗張家斗張益斗通遠斗北岸

有洛南斗廟王斗文王斗張以斗王益斗晉公斗廣濟斗富衆



斗灌田一千五十畝又東入臨潼界縣○中南渠斗門十五長安

畝說○按今中南渠自磨子橋又分二渠東南曰

高望渠 在縣西北二十五里縣高望渠東西長三十五里宋敏求長

安志自磨子橋分中南渠水南岸有福斗康斗寧斗壽斗念斗百

斗萬斗北岸有乾斗震斗沛養斗千斗億斗灌田八百四十畝

又東入臨潼界縣高望渠斗門十二長安圖說西南曰

禍南渠 在縣西二十五里縣禍南渠東西長四十里宋敏求長安志自

磨子橋分中南渠水西南流又折而東南岸有邊界斗禍南斗

許斗北岸有永斗于元斗灌田三百五十畝舊亦入臨潼縣界

今在縣境船張村注渭縣禍南渠斗門五長安圖說中南渠至張市

里又分二渠其北分者曰

析波渠 今廢縣析波渠斗門一長安圖說其南分者曰



昌連渠 在縣北二十里縣志自張市里分中南渠水東流經縣城

北門外明高陵令王珪嘗引水入城資民食用今北門外猶有

渠迹其渠南岸有沙渠斗北岸有崔家斗距陵斗灌田二百一

十畝昔時亦入臨潼界今下流微細至縣東五里墨張村止縣志

昌連渠斗門三

長安圖說

古渠樊惠渠在縣南古渠圖陽陵縣東其地衍隴土氣辛螫嘉穀

不植而涇水長流光和五年京兆尹樊君勤恤民隱乃立新渠

向之鹵田化為甘壤蔡邕樊惠渠歌序今廢無考縣志

鄠縣

太平峪東渠 在縣東南三十里太平峪水出峪口分二派正河

東北流至大良村開渠灌大良村南城寨南波堡田千餘畝其

支分西北流者為



太平峪西渠

經流重云寺宋村焦將堡孫姑村黃堆堡灌田一

千三百餘畝其下流入小泥河

縣冊○按十道志太平峪水有清渠又東北入長安縣界今廢

無考

澇河東渠

在縣西南二十五里澇峪水出峪口分二派正河東

北流涇流白雲寺羅什寺木家庄灌田三百餘畝其西北流者

為

澇河西渠

經流水磨頭龍家寨斑竹園倫公村孫家磴灌田千

餘畝下流入澇河

縣冊

白沙泉

在縣西南五里割耳莊西引流灌本處田十餘畝又相

近有

美泉

亦灌田十餘畝

府志

胡公泉

在縣西南十里大八村上有胡公廟故名灌本處田八



十餘畝合白沙美泉二水經流曲抱村西灌田五百餘畝又下

入澇縣冊

化羊里潭 在縣東南二十里化羊里地勢窪下居民隨地掘潭

引流灌溉縣冊

冷泉 在縣東南十五里灌雙莊堡田數十畝縣冊

沒豬泉 在縣南二十里灌焦家堡田百餘畝縣冊

阿福泉 在縣南三十里灌田數十畝縣冊

徐公渠 在縣東縣圖邑東兆豐橋一帶二十餘村地勢卑下原有

渠宣洩積水奈渠道淺隘每久雨則田苗淹沒邑令荔浦徐雲

提集諸村人大加疏鑿身深五尺濶一丈直通於渭自是水有

所歸二十餘村水患遂息縣志

金公堤 在縣西關外澇水經縣西門外有石橋以通往來歲久



河水遷徙竟於橋西衝決河道置橋而西行秋雨水漲田苗淹沒廣寧金廷襄泣鄆特築堅堤徧植楊柳堤成幾二百丈自後久雨河漲田苗不傷縣志

古渠檀谷水十道志曰長樂渠之上流也源出縣南終南山檀

谷宋敏求檀谷河灌安善里田數十畝今廢縣志○古泉在縣東

南化羊里灌田一頃縣志○紫閣河在縣南灌田五頃縣志今廢縣志

○呂公河在縣東明萬曆中知縣呂仲信開故名引潭峪皂峪

阿福泉諸水徑東關外北折而西入澇水知縣白應輝復疏濬

又鑿縣南栗峪直峪諸水謂之新河引流入呂公河後漸湮廢

崇禎間知縣張宗孟以寇警復濬深廣寬二丈深一丈增開西

南二面引澇水自白雲山起由天和村羅什寺木家莊至南關

外入新河及城壕居民咸享其利



本朝康熙年知縣康如璉重修縣志○三里河自南澇店迤南引澇

水自澇店鎮分渠灌中原渭曲興仁三里之田自龍臺坊入渭

明知縣張宗孟開府志今俱廢縣志

藍田縣

石門堰 在縣西四十里引石門峪水灌田三十畝縣志高祖武德

六年寧民令顏旭開渠引南山水入京城至石門谷有溫泉湧

出冊府元龜

田家渠 在縣西南五十里引庫峪水於西岸開渠灌田家村田

三十畝其東岸開渠灌田者首為

肖家渠 灌肖家村田三十畝峪水又北流為

楊家渠 從田家坡開渠灌楊家村田四十畝又北為

弓家渠 灌弓家村田四十畝又北為



黃甫川老安堰

從肖家坡開渠灌田八十五畝

縣冊

袁家堰

在縣西四十里湯峪水出峪口於西岸築堰灌田者首

為袁家堰經流石佛寺灌田六十五畝又北為

堯家渠

從堯家村開渠灌田十五畝其在峪水東岸築堰灌田

者首為

白家堰

從尖角村開渠經流白家村灌田七十餘畝又北為

苟家渠

灌本村田二十餘畝又北為

劉家渠

渠首起溜沙坡經流劉家村灌田四十餘畝

縣冊

又北為

石牌坊焦老堰

灌田二十七畝

縣冊

蘆子溝堰

在縣西二十里引本溝水分小渠三灌田九十三畝

縣冊

雙溪渠

在縣西二十里引獐坡泉水經流桑家村灌田一百三



十畝縣冊

沐峪溝渠

在縣西二十里引沐峪溝水灌田三十畝縣冊

焦岱老安堰

在縣西三十里引焦岱河水灌田五十餘畝河水

又北爲

鬼神岔陝家渠

灌吳門楊門等寨田三十餘畝縣冊

侯家渠

在縣西南四十里引採峪水經流侯家村灌田四十五

畝採峪水又北爲

史家渠

灌史家寨田二十畝縣冊

張家堰

在縣南十里引砂河水在河口作堰經流本村灌田七

十畝下又支分小渠三道共灌田二百七十畝縣冊

南民堰

在縣南十里引輞峪水在西岸築堰灌榆林村張家村

田二百八十畝峪水又北爲



西原坡李家堰 從吳家堰開渠灌田三十畝其在岸東者首爲薛家堰 從峪口開渠灌本村田四十畝又北爲

焦馬堰 灌本村田三十畝

縣冊

悟真峪渠 在縣南十五里引悟真峪水即清河水在峪口西岸悟真寺前開渠經流陳家灘灌田三十畝河水又北爲

軍劉堰 從陳家灘開渠經流本村灌田二十七畝河水又北爲蓮花池堰 在清河下流開渠灌蓮花池田一百五十畝河水又北爲

張軍堰 即窟陀堰從韓家寨開渠經流窟陀村張軍寨灌田二百二十畝其在岸東者爲

紅水堰 從峪口開渠灌田五十畝又北爲

陳家堰 亦在峪口開渠灌陳家灘田三十畝

縣冊



曹家堰

在縣東南二十五里引散峪水於峪口築堰開渠經流

胭脂臺北灌田一百五十畝

縣冊

穆家堰

在縣東南五十里引倒迴峪水渠首起豐盈寺經流本

村下又分小渠三道共灌田四百二十畝

縣冊

孫家渠

在縣東南五十里引桐峪水從峪口開渠經流本村灌

田五十畝

縣冊

玉山馬家堰

在縣東四十里引玉山水灌成家村潘家村田六

十畝

縣冊

安溝小堰

在縣東二十五里引劉家溝水經流安溝村灌田三

十五畝

縣冊

土膠河渠

在縣東一里嘉靖二年邑令王公科鑿引入城入東

出西民享田園之利日久渠道梗塞至順治年間顧公介石指



畫詳明令入東南隅出西北隅厥功未竟至郭公顯賢始加意

修濬渠成較前更濶縣志今仍流入城內無灌溉之利縣志

三里渠 在縣北三里引漪水河經流三里舖至青原莊灌田二

十餘畝縣志

沈家堰 在縣北五里引五里河經流白楊寨灌田百餘畝縣志

席家堰 在縣北十二里引磨李溝水經流十里舖灌席家村田

九十餘畝縣志

紅河堰 在縣北三十五里引紅河水渠首從支家溝起經流雙

水磨等村灌田三十畝縣志

潘家小渠 瀾水入縣境居民分兩岸疏引灌田其在南岸者為

潘家小渠距縣東三十里灌田四十畝瀾水又西流會散峪水

為



郭把堰 從石頭灘開渠經流馬家灣灌田一百三十畝下支分  
小渠三道灌田九十餘畝灞水又西爲

蔡家渠 從胭粉臺開渠經流程槽村灌田三十畝灞水又西北  
會輞峪水爲

紅坡崖渠 灌陳家溝田三十畝其在灞北者首爲

桐峪里李家渠 在縣東五十里從曲子鎮開渠灌田三十五畝  
灞水又西北爲

謝家堰 渠首從灞河昇起經流褚家莊灌田四十畝灞水又西  
北爲

翟家堰 從翟家村開渠灌本村田百餘畝灞水又西爲

元君廟雷家渠 從成家村開渠灌本村田四十畝灞水又西爲  
老人倉李家渠 從馬家樓開渠灌田四十畝灞水又西爲



秋樹廟小堰 堰在安溝渠入壩處經流梁斜村灌田四十畝壩水又西爲

石獅村小渠 渠從石頭灘起經流石獅村北灌田三十畝壩水又西爲

青泥坊杜榜堰 在胭粉臺開渠經流約六七里灌田四百八十畝壩水又西爲

羅李堰 在青泥坊開渠經流羅李村灌田百餘畝下又支分小渠三道共灌田七十五畝壩水又西會土膠河水至縣南門外西寨村爲

葉家堰 堰在土膠河入壩處經流縣南關外灌田四十畝壩水又西爲

馬家堰 堰在南關外灌田五十畝又稍西有



加河堰馬家渠 亦在南關外灌田五十畝灞水又西為

樊家堰 堰接加河堰其對岸乃輞峪水入灞處經流本村灌田

六十八畝灞水又折而西北流為

席家小堰

在縣青原莊開渠以近席家堰故名

○席家堰見前引磨李溝水而

此地則磨李溝入灞處也

經流白楊寨灌田六十三畝灞水又西北為

高家堰

在縣北十里鋪開渠經流席家河至洩湖鎮灌田七十

畝灞水又西北為

張家渠

渠在縣紅河入灞處經流斜里村灌田七十畝

縣冊

吉家灣渠

在縣東北三十里引泉水其流甚細無資於灌溉

縣冊

古渠附

馬家灣渠○夫車村渠○厚子鎮渠俱引泉水灌田今涸

縣冊

涇陽縣



龍洞渠 在縣西北六十里雍正五年奉

上諭將鄭白龍洞挑濬務期渠道深通堤堰堅固督臣岳鍾琪遵

旨築濬自龍洞以下淤塞盡去涇陽醴泉三原高陵臨潼五縣皆饒

灌溉七年總督查郎阿以渠工需員專理

題請西安管糧通判改董水利得隨時脩葺無廢厥工渠鑿仲山

龍洞引龍洞泉又東會篩珠洞泉又東會瓊珠洞泉按數泉中

大又東過水磨橋按此橋與下大王小王野狐趙家四橋俱所

渠身不致又東會倒流泉按此泉今半入渠半入涇若用石砌

無小又東至大小梯子崖崖下有井曰中渠井此井濬渠時渠

補又東至天元渠又東至王御史口又東至火燒橋此橋亦

注于又東為小退水橋按退水橋乃不用水時又東

會天滂池諸泉諸泉無名又東會碧玉泉噴玉泉暗流泉鳴玉泉



琴泉又東爲樊江渠之退水槽又東過分水嶺會分水泉又東

會菜園倒流泉又東爲大王橋又東過臥牛石又東爲小王橋

又東爲大退水槽又東爲野狐橋又東至大龍王廟爲大小暗

橋接暗橋隱地中上皆泥沙又東過趙家橋又東南爲樊坑渠

又東南過馬道橋渠至此始出山就平陸開渠灌田首爲王屋

一斗又東南爲王屋二斗又東南至百谷鎮折而東流爲王屋

三斗又東爲王屋四斗自一斗至四斗與醴泉分灌田畝下則專溉涇田又東爲張房

一斗又東爲張房二斗又東爲張房三斗又東至北峪街爲雙

槐一斗又東爲雙槐二斗又東爲小留一斗又東爲小留二斗

又東爲寧村一斗又東爲寧村二斗又東逕石橋鎮南爲店西

斗又東爲威勝斗又東逕大安寺北爲李相公斗又東爲何氏

一斗又東爲何氏二斗又東過王家堡爲七叔斗又東爲石叔



斗又東過甘皇廟爲智光斗又東爲聖女小斗又東爲聖女大斗又東爲駙馬西斗又東爲駙馬東斗又東爲染渠斗又東爲鐵眼成村斗又東爲白公斗又東爲三限閘閘分上中下三限今俗名三渠口其北限爲

北白渠 即上白渠從三限閘分水東北流北岸有長渠師和余家三斗南岸有新開斗南北王斗又東北流入三原縣界中限爲

中白渠 俗名下中渠係龍洞渠正身正東流過漢堤洞南舊從北岸支分一渠曰

狂渠 今廢南岸有西王斗郭馬南斗閤王斗北岸有郭馬北斗高陽斗長流斗內原斗又東爲高陵縣之彭城閘下限爲

下白渠 一名小白渠東南流過漢堤廟南從南岸開斗首爲曹



件西斗又東南爲曹件東斗又東南爲落橋斗又東南爲小  
流斗又東南爲盧從斗渠水至此盡入民田不復灌溉他縣龍  
洞渠在秦爲

鄭國渠 韓聞秦之好興事欲罷之乃使水工鄭國間說秦令鑿

涇水自中山西邸瓠口爲渠並北山東注洛三百餘里欲以灌  
田中作而覺秦欲殺鄭國鄭國曰始臣爲間然渠成亦秦之利  
也秦以爲然卒使就渠渠就用注填闕之水溉澤鹵之地四萬  
餘頃皆畝一鍾於是關中爲沃野無凶年秦以富强卒并諸侯

因命曰鄭國渠

史記河渠書

始皇元年己卯作鄭國渠

六國表

息夫躬

言秦開鄭國渠以富國强兵今爲京師土地肥饒可度地勢水  
泉灌溉之利天子使躬持節領護三輔都水

漢書息夫躬傳

沮水東注

鄭渠渠首上承涇水於中山瓠口所謂瓠中也渠瀆東逕宜秋



城北又東逕中山南又東逕捨車宮南絕冶谷水又東逕截薛山南池陽縣故城北又東絕清水又東逕北原下濁水注焉

水經

注京兆雲陽縣有鄭渠

與通

鄭渠起於瓠口今駱駝灣西北是也

上至白公渠口二千七百餘步

元宋渠渠  
涇渠條陳

韓惡秦之強陰使水

工鄭國入秦興水利以疲之國至秦北山下視涇河巨石磷磷

約三四里許而涇水流於其下堪以作堰於是立石困以壅水

每行用一百餘困凡一百二十行借天生衆石之力以爲堰骨

又恃三四里衆石之多以爲堰勢涇流於此不甚激亦不甚濁

且堰高地下一瀉百里東收洛水達於同州灌田四萬餘頃利

何溥也夫名爲水利而謀本疲秦則渠成之難可知矣時猶土

渠也非穿山也時猶順水性也非與水爭也第涇流怒激衝矣

激滌日下河中石漸吹落故石困無著漢已不能引涇入渠矣



明袁化中  
在漢為  
涇渠議

六輔渠

關中輔渠

史記河渠書

元鼎六年兒寬為左內史奏請穿鑿

六輔渠以益溉鄭國旁高卬之田

漢書溝洫志

兒寬為左內史表奏

開六輔渠定水令以廣溉田收租稅時裁濶狹與民相假貸兒寬

傳

顏師古曰溝洫志云益溉鄭國高卬之田此則於鄭國渠上

疏南岸更開六道小渠以輔助灌溉耳今雍州雲陽三原兩縣

界此渠尚存鄉人名曰六渠亦號輔渠

本傳

初鄭國分涇水置

鄭渠後兒寬又穿六輔渠今此縣與三原界六道小渠猶有存

者

元和志

六輔渠今白渠北限所經即其地也但顏所謂南岸者

恐當作北岸

長安圖經

六輔渠開後旋廢

三原縣志

後又為

白渠 自漢至五代皆因之太始二年趙中大夫白公奏穿渠引

涇水首起谷口尾入櫟陽注渭中袤二百里溉田四千五百餘



頃因名曰白渠民得其饒歌之曰田於何所池陽谷口鄭國在

前白渠起後舉重為雲決渠為雨涇水一石其泥數斗且溉且

糞長我禾黍衣食京師億萬之口漢書溝洫志鄭白之沃衣食之源

提封五萬疆場綺分溝塍刻鏤原隰龍鱗決渠降雨荷重成雲

五穀垂穎桑麻鋪荼西都賦浸決鄭白之渠西征賦苻堅以關中水

旱不時依鄭白故事發其王侯已下豪望富室僮隸三萬人開

涇水上源鑿山起堤通渠引瀆以溉岡鹵之田及春而成百姓

賴其利晉書苻堅載紀白渠引涇水起谷口出於鄭渠南東逕宜春城

南又東逕池陽城北枝瀆出焉水經注始皇元年鑿涇水為鄭國

渠至漢武帝元鼎六年一百三十六歲兒寬為左內史又奏請

穿六輔渠以益溉鄭渠旁高卬之田後十六歲趙中大夫白公

奏穿涇水注渭中溉田四千五百餘頃大白渠在涇陽縣東北



十里中白渠首受大白渠東流入高陵縣界南白渠首受中白

渠東南流亦入高陵界

元和志

河隄謁者六人涇渭白渠以京兆

少尹一人督視

唐書百官志

雲陽縣有古白渠

地理志

涇陽有中白太

白南白渠

通典

永徽六年雍州長史長孫祥奏言往日鄭白渠既

田四萬餘頃今為富商大賈競造碾磴堰遏費水渠流梗澁止

既一萬餘頃請脩營此渠以便百姓至於鹹鹵亦堪為水田高

宗曰疏導渠流使通灌溉濟沃災旱應大利益太尉無忌對曰

白渠水帶泥淤灌田益其肥美又渠水發源本高向下枝分極

衆若流至同州則水饒足比為磴碾用水洩渠水隨入滑加以

壅遏耗竭所以得利遂少於是遣祥等分檢渠上碾磴皆毀之

白孔

開元元年李元紘擢京兆尹詔決三輔渠時王公權家皆

傍渠立磴瀦遏爭利元紘勅吏盡毀之分溉渠下田

唐書李元紘傳



栖筠進戶部侍郎關中舊仰鄭白二渠溉田豪戚壅上游取磴利且百所奪農用十七栖筠請皆撤毀歲得租二百萬民賴其

入

李栖筠傳○按此係廣德二年事

黎幹為京兆尹涇水壅隔請開鄭白支渠

復秦漢故道以溉民田廢碾磴八十餘所

王縉傳

薛王知柔為京

兆尹始鄭白渠梗壅民不得歲知柔調三輔治復舊道灌浸如

約遂無旱虞

惠宣太子業傳

昭懿公主始封升平下嫁郭曖家內民訴

涇水為磴壅不得溉田詔撤磴以水與民時主及曖家皆有磴

乞留帝曰吾為蒼生若可為諸臧唱即日毀由是廢者八市所

公主傳

秦漢鄭渠溉田四萬頃白渠溉田四千五百餘頃永徽中

兩渠灌浸不過萬頃大曆初減至六千畝股一斛歲少四五

百萬斛復兩渠之饒誘農夫趣耕屯田蓄力河隴可復

突厥傳

貞

元四年涇陽三白渠限口準諸堰例置監十六年詔以東渭橋



納給使徐班兼白渠使太和初內出水車樣令京兆造水車給

鄭白渠百姓灌溉

會要

太和元年京兆府奏准御史中丞溫造等

奏脩渠堰貞元初以京兆少尹郭隆充渠堰使於涇陽縣衆善

寺置院往來勾當今請差少尹韋文恪充渠堰使令自揀擇清

強官三人專令巡檢脩造從之光啓元年詔曰關中鄭白兩渠

古今同利四萬頃沃饒之業億兆人衣食之源比者豪權競相

占奪堰高磴下足明棄水之由稻浸稂澆乃見浸田之利今因

流散尚可經營宜委京兆尹選強幹僚屬巡行鄉里逐便相度

兼利公私後周顯德五年以工部郎中何幼冲充關西渠堰使

命於雍耀間疏涇水以溉田

冊府元龜

白渠在涇陽縣西北六十里

堰涇水入焉西自雲陽縣來東入高陵縣界十道志曰太白中

白南白謂之三白渠渠上斗門四十八三限口在縣東北分南



北中三渠處

宋敏求長安志

白渠灌涇陽高陵櫟陽及耀州雲陽三原

富平凡六縣斗門百七十餘所

光學菴筆記

白公渠今小龍潭是也

上至宋豐利渠五十六步

宋秉亮涇渠條陳

在宋為

豐利渠

按宋元雖各有渠名而三白之名自漢後相沿不異

三白渠在京兆涇陽縣淳化二

年秋縣民杜思淵上書言涇河內舊有石翼以堰水入白渠溉

雍耀田歲收三萬斛其後多歷年所石翼以堰水壞三白渠水

少溉田不足民頗艱食乾德中節度判官施繼業率民用稍穰

芑籬棧木截河為堰壅水入渠沿渠之民頗獲其利然凡遇暑

雨山水暴至堰輒壞至秋治堰所用復取於民民煩數役終不

能固乞依古制調丁夫修疊石翼可得數十年不撓所謂暫勞

永逸矣詔從之遣將作監丞周約已等董其役以用功尤大不

能就而止至道元年正月度支判官梁鼎陳堯叟上鄭白渠利

能就而止至道元年正月度支判官梁鼎陳堯叟上鄭白渠利



害按舊史鄭渠原引涇水溉田四萬頃白渠亦引涇水溉田四  
千五百頃兩渠溉田凡四萬四千五百頃今所存者不及三千  
頃皆近代改脩渠堰浸隳舊防由是灌溉之利絕少於古矣鄭  
渠難爲興功今請遣使先詣三白渠行視復修舊迹於是詔大  
理寺丞皇甫選光祿寺丞何亮乘傳經度選等使還言周覽鄭  
渠之制用功最大並仲山而東鑿斷岡阜首尾三百餘里連亘  
山足岸壁頽壞堙廢已久度其制置之始涇河平淺直入渠口  
暨年代浸遠涇河陡深水勢漸下與渠口相懸水不能至峻崖  
之處渠岸摧毀荒廢歲久實難致力其三白渠溉涇陽櫟陽高  
陵雲陽三原富平六縣田三千八百五十餘頃此渠衣食之源  
也望令增築堤堰以固護之舊設節水斗門一百七十有六皆  
壞請悉繕完渠口舊有六石門謂之洪門今亦隕圯若復議興



置則其功甚大且欲就近度其岸勢別開渠口以通水道歲令渠官行視岸之缺薄水之淤填即時浚治嚴豪民盜水之禁涇河中舊有石堰脩廣皆百步捍水雄壯謂之將軍堰廢壞已久杜思淵嘗請興脩而功不克就止造木堰凡用梢椿萬一千三百餘數歲出於緣渠之民涉夏水潦木堰遽壞漂流散失至秋復率民以戢之數斂重困無有止息欲令自今溉田既畢命水工拆堰木實於岸側可充二三歲脩堰之用所役緣渠之民計田出丁凡調萬三千人疏渠造堰各獲其利不憚勞也選能吏司其事置署於涇陽縣側以時行視往復甚便時著作佐郎孫冕總監三白渠詔冕依選等奏行之後自仲山之南移置涇陽縣景德三年鹽鐵副使林特度支副使馬景盛陳關中河渠之利請遣官行鄭白渠興脩古制乃詔太常博士尚寶乘傳經度



率丁夫治之實言鄭渠久廢不可復今自介公廟迴白渠洪口直東南合舊渠以畎涇河灌富平櫟陽高陵等縣經久可以不竭工既畢而水利饒足民獲數倍

宋史河渠志

康定中三白渠久廢

京兆府薦雷簡夫治渠事先時治渠歲役六縣民四十日用稍木數百萬而水不足簡夫用三十日稍木比舊三之一而水有

餘

雷簡夫傳

天聖六年二月都官員外郎李同言永興軍涇陽縣三

白渠節約水勢宜立約以限水命同知涇陽縣領三白渠事景祐三年二月丁卯脩陝西三白渠初漕臣王公言三白渠漢溉田四萬頃唐永徽中亦灌田萬頃今才及三千餘頃請調兵夫脩治之公又言鄭白渠皆上源高處爲堰沿渠立斗門者至四十餘所所以分水勢其下別開小渠分以溉田其作堰之法宜用石錮以鐵積之於中流擁爲雙派南流者仍爲涇水東注者



醜爲二渠故雖駭浪不能壞其防熙寧五年涇陽令侯可議鑿  
小鄭渠引涇水高與古鄭渠等十一月十七日都水丞周良孺  
言自石門北開二丈四尺堰涇水入新渠可溉田二萬餘頃開  
至臨涇就高入白渠則水行二十五里利益廣開至三限口五  
十里接雲陽可溉田三萬餘頃詔如其議自石門至三限合白  
渠興脩七年殿中丞侯可議自仲山旁鑿引涇水東南與小鄭  
渠會下流合白渠尋罷

玉海

鄭白渠秦漢以下皆獲其利熙寧中

神宗講求治功興葺遺利先祖殿中丞建明鄭白之利神宗賜

對便殿大稱聖心付其事興役踰年功已有叙害能者巧爲沮

止不終厥工今則又非昔比涇水低下渠口高卽灌溉之功幾

盡廢矣民用困乏職此之由今誠脩濬使秦中歲增穀百萬斛

豈不甚大

程明道代人上宰相論鄭白渠書

大觀元年閏十月主客員外郎穆



京奉使陝西以白渠歲罷民堰水起十月盡次年四月其間水  
壩堰與堤防圯壞溉田之利名存而實廢者十居八九得獻計  
者宣德郎范鎬鄜州觀察推官穆卞謂熙寧間嘗命殿中丞侯  
可議自仲山傍鑿石渠引涇水東南與小鄭泉會下流合白渠  
鳩工自熙寧七年秋至次年春渠之已鑿者十之三當時以歲  
歉弛役今其蹟可考按舊跡而導建瓶之勢易若反掌乃謂本  
路提舉常平使者趙侗與獻說者相地計工二年七月詔可侗  
侗董其事經始以是年九月越明年四月土渠成廣一丈八尺  
深視地形高下袤四千二百二十丈南與故渠合明年閏八月  
石渠成下廣一丈二尺上廣一丈四尺深視地形高下袤三千  
一百四十有一尺南與土渠接又度渠北地勢高峻通竇以防  
漲水凡溉涇陽醴泉高陵櫟陽雲陽三原富平七縣田三萬五



千九十三頃賜名豐利渠

侯蒙開渠記畧

永興軍耀州六縣民田舊資

白渠灌溉之利歷時已久涇流寢低渠勢高仰不能取水大觀

元年今秦鳳經畧使穆公京以太府少卿出使陝西宣德郎范

鎬承直郎穆卞因言開脩洪口石渠之利穆公具聞於朝提舉

常平等事趙公佺被旨相視具陳可成之策朝廷命趙公總浚

渠事初議鑿石與涇水適平然後立堰趙公謂立堰當爲遠計

使渠深下水面五尺則無修堰之弊而利溥且久既終功凡石

土渠一千一百一十九尺石渠北自涇水上流鑿山尾南與土

渠接土渠北自石渠口東南與故渠接石渠依涇之東岸不當

水衝乃即渠口鑿二渠各開一丈南渠百尺北渠百五十尺又

涇水漲溢不常乃即火燒嶺之北及嶺下因石爲二洞曰迴瀾

曰澄波又其南爲二閘曰靜浪曰平流以節湍激渠之東岸有



三溝曰大王溝曰小王溝又其南曰透槽溝夏雨水集每與大石俱下壅遏渠水乃各卽其處鑿地樹木爲柱密布如櫓貫大木於其上橫當溝之衝暑雨暴至則水注而下大石盡格透槽之口與石棚接又其東且十里曰樊坑當白渠之南岸其北直大溝溝水暴則岸壞與渠流俱潰壅之則渠不能容而下流爲田患乃疊石爲渠岸東西四十尺北高八尺上濶十七尺其南石尾相銜而下四十尺溝水至則渠之所受滿其堤而止泄餘水注坑中與涇合於是平導涇水深五尺下泄瀉三白故渠增溉七縣田歲可三萬頃

蔡溥洪口石渠記

石棚者石隱地中上下皆土

水從下過空如棚狀今所謂暗橋者是也大王溝小王溝透槽溝三溝皆在古白渠次北豐利渠東其溝皆從東來橫衝渠身開渠之時將上二溝下流穿斷惟透槽溝至渠上適有石棚渠



水流於棚下暴雨則水石從棚上過流入涇河故當時樹木為

柱以拒大石而沙礫尚入渠內至前金時有主簿荆姓者始構

兩石橋於涇水上使與溝口相接其制橋上外高中低如槽狀

遇溝水暴漲砂石皆從上過直入涇河而渠方免石壅之患今

人猶呼曰澄水槽長安圖說白渠經歷唐宋至大觀初涇河日低渠

不能引命提舉常平使者趙佺於白渠北鑿渠渠成名為豐利

更借上流河中大石築大堰引涇水下接白渠復灌田三萬五

千餘頃袁化中涇渠議金宣宗興定五年十一月議興水田勅令分治

戶部按州郡有可開者誘民赴功其租止依陸田仍以官激賞

之陝西除三白渠設官外亦視例施行金史食貨志傅慎微同知京

兆尹脩三白龍首等渠以溉田傅慎微傳在元為

王御史新渠京兆三白渠自元伐金以來渠堰缺壞土地荒蕪



陝西之人雖欲種蒔不獲水利太宗之十二年梁泰奏請差鄉人戶牛具一切種蒔等物比之旱地其收數倍太宗准奏就令梁泰佩元降金牌充宣差規措三白渠使郭時中副之直隸朝廷置司於雲陽縣所用種田戶及牛畜別降旨付塔海紺不於軍前應付涇渠宋熙寧年間詔賜常平息錢助民興作自仲山旁開鑿石渠從高瀉水名豐利渠元至元間立屯田府督治之大德八年涇水暴漲壞堰塞渠陝西行省命屯田府總管夾谷伯顏帖木兒及涇陽尹王琚疏導之起涇陽高陵三原櫟陽用水人戶及渭南櫟陽涇陽三屯所人夫共三千餘人興作水流通如舊其制編荆爲圍貯之以石復填以草以土爲堰歲加葺理至大元年王琚爲西臺御史建言於豐利渠上更開石渠五十一丈濶一丈深五尺積一十五萬三千工每方一尺爲一工



自延祐元年興工至五年渠成是年改堰至新口英宗至治元年十月陝西屯田府言自秦漢至唐宋年例八月差使水戶自涇陽西仲山下截河築洪堰改涇水入白渠下至涇陽縣北白公斗分爲三限井平石限蓋五縣分水之要所北限入三原櫟陽雲陽中限入高陵南限入涇陽澆溉官民田七萬餘畝近至大三年陝西行臺御史王承德言涇陽洪口展脩石渠爲萬世之利由是會集奉元路三原涇陽臨潼高陵諸縣洎涇陽渭南櫟陽諸屯官及耆老議展脩八十五步計四百二十五尺深二丈廣一丈五尺計用石十二萬七千五百尺人日採石積方一尺工價二兩五錢石工二百丁夫三百金火匠二用火焚水淬日可鑿石五百尺官給其糧食用具丁夫就役使水之家顧匠傭值使水戶均出陝西省議計所用錢糧不及二年之費可謂



一勞永逸准所言委屯田府達魯花赤只里赤督工自延祐元年二月十日發夫匠入役至六月十九日委官言石性堅厚鑿僅一丈水泉湧出近前續展一十七步石積二萬五千六百尺添夫匠百人文宗天曆二年三月屯田總管兼管河渠司事郭嘉議言去歲六月三日驟雨涇水泛漲原修洪堰及小龍口盡圯水歸涇白渠內水淺爲此計用十四萬九千五百十一工役丁夫一千六百度九十三日畢於使水戶內差撥每夫就持麻一斤鐵一斤繫圍取泥索一草苫一陝西準屯田府照洪口自涇陽下至臨潼五縣分流澆溉民田驗田出夫千六百人自八月一日修堰至十月放水溉田以爲年例近因奉元亢旱五載失稔今差夫又令就出用物實不能辦集竊詳涇陽水利雖分三限引水溉田緣三原等縣地里遙遠不能依時周徧涇陽北



近俱在上限並南限中限用水最便今次脩堰除見在戶依例  
差役其逃亡之家合出夫數宜令涇陽縣近水利戶添差一人  
官日給米一升併工脩治省準出鈔八百錠委耀州同知李承  
事洎本府總管郭嘉議及各處正官計工役照時值糴米給散  
李承事督夫脩築至十一月十六日畢至正三年御史宋秉亮  
相視渠堰謂渠積年坎取淤土疊於岸極為高崇力難送土於  
上因請就岸高處開通鹿巷以便夫行廷議允可四年屯田同  
知牙八胡涇尹李克忠發丁夫開鹿巷八十四處削平土疊四  
百五十餘二十年陝西行省左丞相帖里帖木兒遣都事楊欽  
脩治凡溉農田四萬五千餘頃

元史河渠志

洪口石堰當河中流直

抵兩岸立石困以壅水困行東西長八百五十尺濶八十五尺

總用困一千一百六十六

制困之法每困用椽四十八條樛稷兩條裏條六十担編之實石其中但



遇水漲損壞即脩之見三原志

石渠下廣一丈二尺上廣一丈四尺土渠下廣

一丈八尺上廣五丈深視地之高下兩岸各空地一丈四岸兩

壁無得擋攔巡水道徑立三限閘以分水其北曰大白渠中曰

中白渠南曰南白渠

南白渠無分支其大白中白分水處詳見三原高陵

立斗門以均水

總為斗一百三十有五

此合五縣全渠而言

渠兩岸各空地五尺限上斗

門十九南限斗門十二中限斗門十北限斗門五

此端指涇陽斗門而言共

四十凡水出斗各戶自以小渠引入其田委曲必達凡脩渠堰

自八月興工九月工畢春首則植榆柳以堅堤岸水廣尺深尺

為一徽一百二十徽為準守者以度量水日具尺寸申報所司

憑以布水各有差等凡用水先令斗吏入狀官給由帖方許開

斗自十月一日放水至六月遇漲水歇渠七月住罷每夫一名

溉夏秋田二頃六十畝仍驗其工給水行水之序自下而上晝



夜相繼不以公田越次霖潦輟功

長安圖說

洪口之利始於秦水工

鄭國至漢大始中水利廢壞趙中大夫白公因其故迹徙開渠口降及隋唐以至於宋其利又廢大觀中復開石土渠名曰豐利迄今二百餘年其利又少至大間監察御史王承德言於豐利渠北更開石渠長五十一丈歲月已久吞水漸少入渠之水既微則築堰勞而民利寡矣嘗攷古今渠利之廢蓋因河身漸低渠口漸高水不能入是白公不容不繼於鄭渠豐利不得不開於白公之後也今豐利渠口水又已漸高王御史現開之石渠又不盡功今若不增治豈惟漸失民利恐日就湮塞近親詣渠口一一相視遂採衆論酌以管見苟欲其利溥博其說有三一曰盡脩渠堰之利二曰復置兩閘之防三曰開通出土之便今相視得湮水自仲山出由高而下河岸去水漸高今量得鄭



渠口至水面計高五十餘尺白渠口至水面計高一丈二尺相  
懸如此雖欲不改不可得也今豐利渠至水亦高七尺有餘方  
新渠未開之時每歲差民起立石固堰水計用固三百八十個  
高丈餘費役甚廣而水益艱澁是以王御史乃於上流窄處疏  
鑿此渠止用固一百十個宜其省費而水可通也然其底亦高  
河水三尺所立固堰厚止三重河流深處固之高者乃至一丈  
五尺浮坐於地每遇河水泛漲不禁衝突易於傾壞反不若宋  
渠之堰鑿石立椿猶以爲固也詢諸衆皆言新石渠起於山脚  
地勢高於接流其底猶有三尺未開宜再開鑿加深八尺如此  
不待固堰之設先有五尺自然之水入渠其固但比水高五六  
尺則渠受水之多不言可知宜計舊堰廣狹新固高下即今三  
重之上截作九重堰既低且厚縱遇小漲只於固上漫流而過



不至衝激傾倒設使圉壞亦不防自然入渠之水一相視舊閘  
二所上下相去四十餘步中間原用退水舊槽至今現存靜浪  
一閘在退水槽近上三十餘步渠身兩壁開鑿切口二道當時  
設此及洪堰倒塌之時即下此閘以備濁水淤澱渠道平流一  
閘在退水槽近下十步渠身兩壁亦有切口四道蓋於注罷澆  
田之後水既無用遂用此閘乃退水由槽還河又當河漲之時  
或泛漲不能猝下或已下而漏漫濁水並下兩閘以防不虞此  
皆古人良法安可廢而不行合將二閘脩治以時開閉則濁泥  
不得入渠穿淘之工可以減半又靜浪相離新渠寫遠濁水入  
渠必至淤澱宜將此閘移於渠口近下一二十步一相視得洪  
口以下石土渠十餘里自古穿淘兩岸積土如山舊時將所積  
高岸開爲通道名曰鹿巷凡穿淘泥沙由鹿巷運於岸外近年



淘出泥土填滿鹿巷只於岸上堆積或遇霖雨其土崩塌復入於渠是以渠道益淺水來益小合於農務未忙天暖人間之時差遣五縣人夫將鹿巷開至平地搬運積土遠離渠岸以漸而去不得似前輒閉岸巷假以歲月積土漸除渠道自通人力既省官政亦簡民之受賜胡可勝言

元宋秉亮  
涇渠條陳

豐利渠利不數年

渠又高堰日壞水不入渠元至大間御史王承德建言更於其上開石渠五十二丈延祐元年興役至元五年功成引水下入故道名曰王御史新渠

袁化中  
涇渠議在明先為

廣惠渠

洪武八年十月濬涇陽洪堰洪堰歲久壅塞不通灌溉

命長興侯耿炳文督工濬之涇陽等五縣之田大獲其利

續文  
獻通

考

永樂三年奉工部勘合差千戶董暹於附近衛分撥軍民相

參修理涇渠民夫一萬四千四百名軍士一萬五千名

府志天順



七年十月濬涇陽縣鄭白故渠

二申野錄

王御史渠口歲久圯壞弗

治成化改元之初副都御史項公忠請自舊渠上并石山開鑿

一里餘就谷口上流引入渠集涇陽三原醴泉高陵臨潼五縣

就役穿小龍山大龍山役者咸篝燈以入遇石剛頑輒以火焚

水淬或泉滴瀝下則戴笠披簑焉功未就項召還朝戊子項復

西征過陝命有司促工責成奏凱還亟以成功紀於石名其渠

曰廣惠而渠實未通也丙申右都御史余子俊又經畧之於大

龍山鑿竅五以取明疏其渠曲折淺狹者踰年余以兵部尚書

召又弗克就訖其功者副都御史阮公勤也公下車三司諸君

以渠爲言且曰向者之費率徵於利及之民今民未獲利而復

徵之恐不堪命公曰然可以帑藏金粟募工市財食役者用匠

四百人五縣之民更番供役以辛丑二月興工渠口有石卧水



中鉅甚乃堰水以西鑿石四尺水得深入又竅小龍山架板  
攔泉溜疏鑿深者至五尺淺者至三尺廣可八尺六月大雨河  
溢壞堤湧沙石壅渠俟少間即築堤堰水疏渠鑿石至十月水  
冰輟工明年正月復作始決去淤塞引涇入渠合渠中泉水深  
八尺餘下流入土渠汪洋如河又下流至所謂三限閘既五縣  
田八千餘畝彭華廣惠渠記後又名

通濟渠

王德間巡撫陝西都御史蕭翀鑿石四十二丈名通濟

渠萬曆間邠乾兵巡道沈子章親歷渠口督工疏補壅漏渠水

廣深倍昔

縣志

萬曆時邑人欲開吊兒嘴引涇水議久不決

三原縣志

洪堰渠口漸改漸高山勢漸狹水利日微撫臺項公請自舊渠

上於龍山後崖劃開鑿石渠一里三分欲上收衆泉下通故道

但山中石頑如鐵工作甚難日用炭炙醋淬乃舉鑿焉故名鐵



洞洞深者百餘尺淺者亦不下五六十尺寬僅四尺工役仰視不見天日興工於成化初年暨余公阮公凡十有七載而工始成名曰廣惠渠渠成而官民之力竭矣河流而淤塞之患日甚矣後灌田僅八百頃此非計畫疎工力少也止以廣惠渠口直入涇河兼以廣惠渠身去河流不遠且北山之石堅勁難鑿鑿亦不甚濶故涇水洶湧沙石滾滾而來則渠口塞而不能入即入者流不百步水勢稍緩沙石並沉廣惠之渠身亦中滿而難通矧更上之吊兒嘴平倘開此嘴而可另達一渠則勞一時利萬世豈不繼鄭國之美但鑿成之後勢必復由廣惠以行今廣惠之渠能引涇水而無用則吊兒嘴之脩恐亦廢同廣惠也且今之所急者非水不足也龍洞以下有大泉如斗者數十昔皆入渠今涇水泛漲山麓衝決自天澇池而上水盡入涇入渠者



不過小泉數眼耳倘以吊兒嘴之物力省十之一盡脩諸岸以

收北山之水則水本不小而四縣之利不亦溥乎

涇陽令袁化中議

明三原令張縉彥條議脩渠八策一曰因水激渠舊時脩築之法掘泥貼岸岸窄堆土遇雨衝岸依然入渠壅塞今宜自渠口起至王屋斗先將下流決開由旱溝抵涇河夫役各持鋤鑿將砂石攪起順水衝送其未盡用繩桶運出岸上所謂因勢利導也二曰就近取石舊時砌岸石塊皆取之後山夫運之費每石一尺四錢有餘閱碑陰所載谷口郭氏至欲以生鐵易石謂石價猶浮於鐵價昨審視渠岸傍山而鑿四面皆石雖石性頑硬鑿取稍難而隨鑿隨砌不必旁移一步何等省便三曰夫役包工渠口一帶深山窮谷人烟既少薪火亦艱每縣夫役千百名遇天陰雨每無立站之地今但約照地分工任土人包攬隣近



村落當農暇無事必樂爲用土人既得營利各縣亦不至騷動也四曰分別砌岸近日渠水上溢下漏蓋由舊日脩渠邊用方石中用圓石初若可觀水發即潰土人云舊拆豐利渠岸俱是大塊方石用鐵錠貫連中用糯米石灰灌滿今須照此修理庶可經久其漏者在渠底須拆到底在渠面止拆渠面蓋岸之經久不壞者必其舊時得法不可輕動也五曰添設截板涇水不能入渠以渠中土滿今渠中所受諸泉一塵不染其土沙乃涇水壅之耳涇水由廣惠渠及豐利通濟白渠王御史口漲入者居多由渠岸橫溢而入者亦數年一次是以舊渠口皆大石塞之惟恐不密古碑云四月閉涇口防濁水淤渠七月啓涇口引涇水灌地則古人用河不過數月今必多置木板截口因時啓閉庶無淤渠之患六曰隄防山水渠道淤塞不特涇水泛漲



暴雨山水尤甚觀水磨大王小王三渠俱有石橋駕渠上接山水後又脩野狐橋趙家橋接旱北渠可謂得法今龍洞溝李家溝馬道等處山水仍舊入渠當令各地方無橋處築土堰堵截山水令入店子溝呂家枯沱麻山水有歸渠不受淤塞矣七曰木石堰水似不可行唐人於白渠口鑿孔樹椿下固實石以堰水此洪堰之名所由起也今涇水上流其勢甚急奔雷怒霆數月之力不能當其一瀉似停之便也八曰相其地勢漸次開鑿前初至龍山見渠口壅填不可踪跡涇比渠身可低數尺似不能引之入矣及後復至龍山見渠身因水衝開故趾宛然河水已與之平但龍山下塞而不透耳若掘渠去窒水入渠者可三四分從此遡流而上得尺則尺得寸則寸河身漸高受水漸多直至吊兒嘴無難矣

三原縣志



本朝順治九年邑令金漢鼎重修廣惠渠就谷口上流分涇入渠後涇水奔瀉石堰遏之其怒逾甚土石承委不得不胸渠高水低勢不能引後鑿石渠深入數丈得泉源漢湧而出四時不竭涓涓滔滔經絡諸邑之壤殆無異乎涇也

金漢鼎脩渠記

康熙八年邑

令王際有又脩之

縣志

已西春予詣渠所相其形勢其經營壅潰

不能悉數最要者則如腰堰非設舊截水不能下流也石隔子龍洞非身入其內搜掏積石水將中阻也小退水槽爲上流咽喉必防其泄王御史口尤扼險石隄一圯水將立竭天澇池多磽确須煅煉以鑿之卧牛石以上堤岸滲漏渠水入河者大半米汁油灰灌其石縫方能久固大退水之補滲亦如之其退水稽宜重截鐵練以資啟閉也火燒橋砂石填積中流巨石盡起之而水斯行至旁岡渠趙家橋土與橋平而故道不通下此則



為土渠條析中多淺隘乃同吾涇二尹張君躬率興作石堅  
舉火煨開洞幽者引繩深入漏者補淤者疏始於季春朔次月  
終告竣王際有脩渠記厥後日漸淤塞水利微細自雍正五年脩濬後  
渠始流通共灌涇陽醴泉三原高陵田七萬四千三十二畝內  
專灌本縣地六百三十七頃縣志

按此渠上承涇水中受諸泉由高趨下勢若建瓴誠秦民衣食  
之源關中膏腴之最也鄭國開渠之始渠與河平涇水順流而  
入又東合冶清濁三峪及簿臺石川諸河東北注洛故能溉田  
四萬餘頃自鄭渠廢而白渠興循涇而流東南注渭其所灌者  
才及鄭渠什一耳厥後河流日下渠身益高宋之豐利元之王  
御史明之廣惠通濟等渠要皆刊山鑿石力爭上流其始未嘗  
不灌溉優渥而後卒不繼者總由涇水在山勢甚洶湧本石圉



堰旋設旋衝兼之石渠狹隘涇水泥多一入之後遂致中滿此亦理勢之必然者也我

皇上軫念民依興復古制

特發庫帑以疏通又設專官以董理其爲秦民謀樂利者至矣司其事者必須酌古準今相時度地勤脩渠堰盡收兩岸之泉漸次鑿山再引上流之水則浸灌之利必有超軼宋元方駕秦漢者茲故備載歷代脩濬之方並前賢利弊之議俾留心溝洫者有所考証焉

上王公渠 在縣北四十五里引冶峪水

縣圖

渠首於冶谷內二里

許傍北鑿引一水出口溉河北之田曰上王公渠稍下一渠曰

磨渠 由磨渠東下六七里開一渠曰

下王公渠 又東三里曰



上北泗渠 又東五里曰

下北泗渠 又東四里曰

仙里渠 後於上王公渠上流分開一渠曰

暢公渠 以上七渠皆在治峪河東北岸縣冊○治峪河出峪南流復折而東故上流為

東岸下流為南岸自下王公對岸開一渠溉河南之田曰

天津渠 東下七里開一渠曰

高門渠 又東六里曰

廣利渠據冊報此渠今已堙廢又東四里曰

海西渠 又東四里曰

海河渠 南與雲陽直以上五渠皆在治峪河南岸治河初止九

渠分爲四堰上下王公磨渠爲一堰天津高門渠各自一堰上

下北泗仙里河海渠爲一堰渠專一堰者每月每日引水入渠



數渠一堰者計各渠地之多寡而以一月之日差分之取月溉一週而已一渠閉然後一渠開後雖於王公渠內增暢公渠高門渠內增廣利渠海河渠內增海西渠然非增堰也四堰逐月並開恐上堰分水多下堰無水可引故也縣志雲陽北境高印涇水不及故引冶谷水西北淳化界來分為七渠以溉近山之田長安圖說七渠東岸曰王公渠鹽渠仙里渠西岸曰天井渠成渠海西渠通一渠長安志渠圖。今惟王公海西尚仍舊名餘皆異

原成渠 在縣東北四十里引清峪河水縣圖清峪水來自耀州至

毛坊里入三原界故三原有毛坊堰此堰專灌三原縣田峪水南流出峪

口為原成渠渠先在涇陽清涼原作堰後因河低渠高乃移堰

於三原之間村在清河上流西岸灌涇陽李家莊田二百畝

此渠作堰處雖在三原而下峪水又南為流專溉涇田三原不露其利



工進渠 渠首在三原縣楊杜村清峪水東岸作堰灌三原縣孫等里田下流入縣界灌縣東盈村田三百畝其下流至魯橋鎮合下五渠峪水又南為

下五渠 一名五渠在本縣峪口清河東岸作堰東南流穿魯橋鎮灌本縣大陽丁梁西朱方南等村田二百畝其下流會工進渠水入三原縣界○下流詳三原縣清峪水又南為

木漲渠 在本縣魯橋鎮西清河東岸作堰灌本縣孟店里田二

百畝下流入三原界縣冊○按清河今共五渠惟毛坊專灌三原原成專溉涇陽工進下五木漲則二縣

共清峪河共四渠西岸曰光城渠東岸曰木漲渠城隍渠長平

渠長安志渠圖○今惟木漲渠仍昔名餘皆異又縣志載清河西岸原成渠下有廣惠廣濟二渠今亦廢

三泉渠 在縣東北四十里引三泉水灌田百餘畝其渠身即清

峪河西岸廣濟渠故道廣濟渠久堙今借泉水灌溉縣冊



古渠

仇班渠太元十年苻堅與慕容冲戰于仇班渠大破之既

而戰於白渠堅兵大敗

晉書苻堅載紀

○茂農渠涇陽縣有茂農渠

隋書

地理志○按茂農渠宋魏求長安志云疑即白渠然他書未載其說姑另列之以存疑

### 三原縣

#### 大白渠

即北白渠自涇陽北限分水至趙家橋東流過焦家堡

又東入西關內支分南流者為石圉斗又東經縣南城至東關

內支分為平臯小斗又東出東關外支分為平臯大斗又東北

經林李堡為曲渠斗又東北經馬家高家等堡至大召村為觀

相斗共灌田二千九百五十二畝

縣圖○按此渠昔時東北入富平今至大召村止

大

白渠之下為

#### 邢堰

堰不知起自何時蓋為北限地高水勢不及遂引清冶二

谷水經三原龍橋鎮以東至邢村截河為防堰其水與涇合流



以溉三原雲陽並渭南屯所之田其堰長四十餘步其下分爲

二渠中有深溝一道蓋古白渠故道也今人名其溝曰乾溝

長安

圖說邢堰在邢村又縣西北一里許清河南岸有古渠一道南抵

白渠又清河上流東岸亦有古渠一道繞縣北關迤邐東北而

去明宣德間遺跡尚存人亦謂之邢堰蓋邢村堰廢後復作此

堰仍襲舊名後亦廢

縣志

邢堰之下又分爲二渠北曰

務高渠

務高斗門二十三

長安圖說

今廢南曰

平臯渠

平臯斗門八

長安圖說

○按今大白渠有平臯大小曲渠觀相等斗與長安圖所載平臯門斗無

異則當日平臯渠即今白渠之經流縣城者但今無平臯渠名耳

中白渠

在縣南官村自高陵入縣界東流至高家堡支分爲洪

沙渠東入臨潼界其白渠正流復入高陵常家村

縣志

毛坊渠

在縣北三十五里洪水鎮南清峪河北岸作堰灌毛坊



楊杜二里田一百一十畝清峪河又自西而南爲

原成渠

渠在縣境閭村清河上流西畔作堰

按清河自耀州入縣境毛坊里西流

數十丈後折而南故毛坊渠在北岸原成渠在西岸

其下流入涇陽灌田峪水又南爲

工進渠

於楊杜村清峪河東岸作堰經第五村又從東支分爲

瓦礫斗又東爲胡斗自東而南爲佛面斗又南爲木完斗其渠

正身則東南穿涇陽縣之魯橋鎮與下五渠合清峪河又南爲

五渠

渠首在涇陽縣峪口西北清峪河東岸開渠行三里許穿

魯橋鎮會工進渠水折而東流入縣界首爲常平斗又東爲務

高斗經潘家等堡又從斗內支分爲南黃斗渠身正東流至無

量廟前會濁峪水爲邢家斗又東爲蔡家斗又東過西陽鎮北

東北流爲大穆王斗又東北爲小穆王斗又東北經康馬堡北

爲翟家堰又東北爲苜蓿斗又東北爲通元斗渠自此又折而



南流爲翟家斗又南爲通元上斗又南爲通元下斗又南爲  
工上斗渠至此又折而西從北岸支分者有耿工中斗耿工下  
斗小王上斗從南岸支分者有潤陵斗下柿園斗上柿園斗大  
王斗瓜兒斗又西與小王上斗對岸者爲小王下斗渠至此正  
西流入西陽鎮之東門又分二支一支北流出鎮北門與先過  
西陽鎮北之渠身合一支西南流出鎮南門復西流爲薦福堰  
清峪水自五渠而下南流爲

木漲渠 渠首在涇陽縣魯橋鎮西谷口下清峪河東岸灌本縣  
留坊杜村等處及涇陽縣孟店里田先時木漲渠河低渠高水  
不能行王端毅公恕命鄉人從谷口以上買地開渠與木漲渠  
相接後因河水泛漲渠口衝壞恕子尚書承裕復於上流買地  
開新渠水得通行舊時作堰俱用河中小石易於衝壞梁中書



希贄輸三千金買大石塊壘砌極厚極寬名曰滾堰水可點滴不漏毛坊工進下五木漲四渠總灌田七萬餘畝縣志

小毛堰

在縣北二十里引濁峪水於上流南岸作堰經流周家

堡灌田三百畝濁河出峪口東流於北岸作堰

濁水來自羅州入縣界先南流

後折而東故小毛堰在南岸長孫渠在北岸

曰

長孫堰

經流九郎廟灌西陽張村等里田五百畝縣志濁峪河自

縣西北華原縣界來經縣西十五里谷口有大堰其水東流溉

民田

宋敏求長安志

三原北境高印涇水不及今引濁峪水西北華原

界來分爲六渠以溉近山之地

長安圖說。按長安志渠圖濁水四渠西爲河西渠東爲西陽

武官小毛西陽渠今惟小毛存餘皆異

烏龍泉

在瓦窰溝大路旁渠以溉田

縣志

黃龍泉

在二郎廟左渠以溉田

縣志



龍尾泉 在老虎溝一泉在上屬富平一泉在下屬本縣合流

田縣

白龍泉 在賈家陂導以溉田

冊縣

白馬神泉 在縣治東北四十里其水泓澄其地有白馬神祠崇

禎七年知縣張縉彥禱祠下令民掘泉水溢數倍灌田甚多

縣志

樊泉 在縣北二十里馮村崖半懸出味甚甘冽導以灌田

縣志

無名泉六 一在陂西王家村北溝內一在小王村觀音寺石佛

座前一在薔薇寺後溝內一在蘇家坡東一在穀村坡李張村

東一在蘆家坡高家菴西俱導以灌田

縣志。據冊報諸泉積水一晝夜可灌田三五

畝

天壽泉 在張村里灌田二畝

冊縣

孫家坡泉 在孫家村灌田一畝

冊縣



娘娘廟泉

在羅漢堡灌田一畝

冊縣

盤屋縣

天河渠

在縣西南四十里引車峪水及鳳凰泉水北流經上寶

峪昌谷坊啞栢堡灌田二百餘畝

冊縣

聖澤渠

在縣西南三十五里引黑營溝水北流經方家山閭家

社雙廟堡師家菴高廟斜里等堡以供食用雍正四年開濬

冊縣

觀音渠

在縣西南二十里引煖泉水東北流經南旺堡供人食

用灌溉花木

冊縣

廣濟渠

在縣西南三十里引西駱峪水北流經雷神寨南神寨

商家磨小麥屯新市頭供民汲飲并灌田二百畝至西關入城

壕又北流入渭

冊縣

南山西駱谷水者嘗引入縣治循郭而東直

入於渭逮於元末水遂堙塞耕者失之漫為陸壤正統癸亥



令鄭公達來宰是邑越明年歲旱井泉俱涸汲者行六七里始  
得水民甚病之公乃詢諸耆老僉曰西駱谷之水常注於此茲  
恨絕久矣雖欲復之故跡已不可識公曰民利也盍興之即相  
地勢高下親爲區畫軍民聞之爭操畚鍤恐後不浹旬渠道大  
闢水勢奔注於壕公乃岐之爲二郭之東西灌民田者不可勝  
計廣濟渠碑記後日久淤塞知縣駱鐘麟重疏濬之縣志

興隆渠

在縣西南二十五里

縣圖

知縣梁克順疏濬廣濟渠支流

溉新寺南望等處田數頃

縣志

興隆渠在廣濟渠東岸支分小渠

經桑園太平等處供人食用現今無灌溉利

縣冊

新口渠

在縣西南二十五里引新口谷水東流經棗林村入遠

村火燒莊供人汲飲

縣冊

紅崖渠

在縣南二十里在盧河西岸開渠作堰經紅崖頭焦家



樓等處灌田一百五十畝河水又北流三里為

二渠 經流西姚村馬家村灌田二百五十畝又北流三里為

李家渠 經流郭家寨灌田三百二十畝又北流二里為

周家渠 經流紀家村灌田二百畝又北流二里為

盧家渠 經流上下高村灌田三百餘畝又北流二里為

艾家渠 經流上沙谷堆堡灌田二百餘畝又北流二里為

蔡家渠 經流蔡家村灌田二百餘畝又北流二里為

上官渠 經流辛家寨灌田九十畝縣冊○按諸渠皆在盧河西岸作五堰分八渠溉田

復盛渠 在縣東南十五里縣圖在盧河東岸開渠作堰經流下沙

谷堆紅花舖朱戶村灌田五十畝縣冊

黃家堰渠 在縣東南二十五里引黑河水在黑河東岸開渠作

堰經流團標峪上下姚村南北三青店等處灌田一千六百畝



縣冊河水又北為

劉家渠 在縣東十里經流北司竹灌田三百五十畝又北流為  
李王渠 在縣東北十五里經流馬坊堡灌田五百五十畝又北  
流為

阿岔渠 在縣東北二十里經流北淇水阿岔村宋家翟家葛家  
等堡灌田五百八十畝縣冊

趙家渠 在縣東北十里引淤泥泉水經唐家灣灌田一百五十  
畝縣冊

就峪渠 在縣東南三十五里引就峪水西支流為渠灌李家莊  
何家村地五十九畝縣志

葦園渠 在縣東二十里引天井泉水經流辛莊堡灌田五百三  
十畝縣冊



貢院泉渠 在縣東十五里引貢院泉水經流南淇水堡溉田六

百七十畝縣冊

龍泉渠 在縣東十五里引龍泉水經流坊頭堡灌田六百五十

畝縣冊

讓泉渠 在縣東二十五里引葦園泉水經流大莊大堅社等堡

灌田二千二百畝縣冊讓泉渠舊名葦園泉渠予受事後有大莊

堡民與大堅社堡民爭渠利已與訟數年予履其地為之因流

溯源大莊堡在葦園泉上流有馬家河水自東南來與葦園泉

合大堅社在葦園泉下流有天井渠水按天井渠即前葦園渠由南來與

葦園泉合彼此相去甚近絕非形格勢阻是葦園泉渠之水大

莊大堅兩堡之田均得資其膏澤而愚民紛爭訐告無異虞芮

小人矣予諭令兩堡輪番灌溉上流者無得壅閼下流者無得



盜決為易名讓泉渠蓋取讓畔讓路之意也又見泉源左有稻

田一畝二分予錫金買其四分俾兩堡居民悉力掘地多出泉

源源深者流自長利賴益無窮矣邑令董雷讓泉渠說讓泉北有一堰曰

龍灣二泉渠 在縣東北二十里流經黑河灣任家淡家等堡灌

田五百餘畝縣冊

磨渠 在縣東南三十里在田峪水西岸引田峪水西北流至樓

觀村合閘仙谷水至省村合東觀谷水縣志共灌省村焦家巷大

王等堡田二千八百八十畝在田峪水東岸引田峪水東北流

者為

金水渠 灌店子頭趙大村北經呂馬村之東又北灌高廟兒田

縣志共灌田二千八百畝後分水又改入下堰亦名金水渠經落

家坡豆村灌田五十畝縣冊



赤峪渠 在縣東南四十五里引赤峪水經辛寨六曲等堡灌田

七十餘畝

縣冊

東磨渠 在縣東南五十里引耿谷水東流經千戶村南集賢榮村橋等處灌田二百八十畝耿谷水西岸爲

西磨渠 引谷水經流孫家堡尚鋪等堡溉田一千三百畝

縣冊

白馬河 在縣東南五十里即耿谷水下流

縣冊

河東北行者淫雨

岸圯衝決爲害知縣駱鍾麟督理修通水循故道其正北行者至官家莊淤塞衝決鍾麟復爲脩築疏濬沿河俱免崩蕩

縣志

乾溝河 在縣西南二十五里即強峪水下流

縣冊

盤邑乾溝河其

源出自西南境之翠鳳山即俗所稱娘娘山者從山麓發源迤邐東行以漸而北至七渠寺則地平土疎易於衝漫每當夏秋之時雨驟至即洪流四布縱恣崩騰明天啓間邑令梁公克顯



留心溝洫導水東行遶六屯之南槐花之東曲折十餘里以入於渭既經途紆遠失其自然之性又歲久淤積河身寢高以故在在泛溢蕩析田廬余初臨此地即相度地勢另闢新河由七渠寺直達渭河不但河中之水不能旁溢為災并平地沮洳低窪泥淖之區并成燥土遂使六十年之塗泥澤國頓改樂郊邑令

章泰乾溝新河記

沙河 在縣東二十里沙泉流出縣冊知縣章泰脩自南淇水以下

黑河灣以上首尾六七里河身僅寬數尺水不能容輒泛溢為患淇水幸莊里黃三里之間無歲不災康熙二十年春開廣三丈濬深一丈兩岸堅築高堤水行堤中止及其半於是稻田大

稔花穀倍收縣冊

古渠附考漆渠在縣南五里宋敏求長安志○靈軹渠在縣北縣圖關中靈軹



引渚水

史記河渠書○按漢書溝洫志作引諸川水

盩厔縣有靈輶渠武帝穿

漢書地理

志

盩厔縣北有蒙龍源上承渭水於郿縣東逕武功縣為成林

源東逕縣北亦曰靈輶源河渠以引渚水

水經注

靈輶渠在縣界

漢武帝穿

宋敏求長安志

靈輶源在故上林苑中今堙

府志

○韋谷渠在

縣西南四十五里水自掃箒嶺流出經塔廟渠廟渠頭等堡至

青花鎮今雖堙沒而渠形尚存係盩郿兩縣界渠

縣冊○按宋敏求長安志

云韋谷渠自南山流下至青花店疑即寰宇記縣境之漳水也

○紅龍渠在縣西南三十五里

引車谷水西流經堡子頭棗園寨關村陳家村入澇池○中望

渠在縣西南引耐山寺泉及煖泉水經師家庵至陳谷坊散漫

民田

縣志

○斑竹園泉在縣東三十里溉終南鎮田○稻峪水王

女泉在縣西南三十里○蓮花池清泉在縣東南二十五里今

并廢不灌田

縣冊



渭南縣

東陽谷水渠

在縣東十里引東陽谷水自康家溝流出經侯馬

郭家蘭家高平等村灌田五十畝

縣冊

清水河渠

在縣南四十里引清水河灌花園常村紙房嶺東田

百餘畝

縣冊

杜化谷水渠

在縣西十里引杜化谷水灌田二十畝旱甚則涸

縣冊

小谷水渠

在縣南五十里引小谷水灌暢家村田三十畝

縣冊

龍泉

在縣南二十里經流張家村王家村灌田十畝

縣冊

瑞泉

在縣南五里青原下灌田十畝

縣冊

古渠

漕渠在縣北一里

宋敏求長安志

自臨潼來又東入華陰界

縣志

白渠在縣北自臨潼縣流入入渭水

古渠圖

白渠又東逕秦孝公



陵北又東南逕居陵城北蓮勺城南又東注金氏陂又東南注

於渭今無水水經注。按隋書地理志載華陰縣有白渠即此

云白渠東注金氏陂而唐書地理志亦載武德二年引白渠水灌下邳金氏陂地則縣境白渠唐時尚流通至宋後始廢也

○金氏陂在縣東北縣圖下邳縣有金氏陂隋書地理志漢昭帝時以

金日磾有功賜其地因名久廢即渠西廢陂是也唐武德二年

引白渠入陂貞觀三年於陂側置監十二年廢監以其田賜王

公古云此陂水滿則關內豐熟陂西又有東陂又南有月陂其

形似月皆名金氏陂今廢寰宇記○義堤在縣北渭河岸邑人光

祿卿史公記事纂尋廢縣圖○赤水堤在縣東縣圖赤水鎮西堡田

舊稱膏腴嘉隆中奔流衝決堡墉漸圯畦隴變為沙汀不啻千

畝張令棟觀水度勢植柳築堤堤下穿水眼以通灌溉自堡東

北隅開渠至西北隅匯於北門左之古渠嗣後水不為堡患田



亦有秋南軒撰赤水堤碑記

○酒水在縣南縣圖酒水西湄人恒築堰作

自風門達之西關北至槐衙計灌田可數十頃又縣東關北

下昔有稻田數百畝蓋崖下有泉十餘又間穿井井丈許可用

桔槔取水灌田今盡廢縣志○西陽谷水在縣南可資灌溉賈志今

無灌溉利縣冊

富平縣

官渠 一名判官渠在縣西北五十里縣圖邑水灌田最多者漆沮

也在縣西北隅所地曰岔口河勢自北而南兩濱皆可導灌田

畝其由東濱而南者初曰判官渠由岔口迄紀家灣灌者十里

縣志今失脩濬無資灌溉縣冊次

文昌渠縣志文昌渠起岔口之韓家溝至紀家堡灌田一千五百畝

縣冊文昌渠在縣西北十七里永閏鄉自義林鄉引漆沮河水溉



民田十里

宋敏求長安志

又南為

通鎮渠

起奧家灘至莊裡鎮

縣志灌田三百畝

縣志

又南為

永濟渠

起韓家溝至檀山寺

縣志

渠口原在韓家溝後因河低渠

高不能引水雍正四年移渠口於奧家灘灌田二百八十畝

永濟渠在縣西北二十五里引漆沮河水溉民田十里

長安志

又

南為

石惠渠

起奧家灘至莊里鎮灌田五百畝

縣志

又南為

自在渠

起檀山寺至張家河

縣志

灌田一百八十畝

縣志

又南為

永興渠

起孫姜村至神芝坊

縣志

灌田二百畝

縣志

又南為

新渠

起西魏頭灌澗裡地

縣志

灌田三百六十畝

縣志

又南為

順陽渠

起許家河至樹連坊

縣志

灌田六百畝

縣志

又南為

石水渠

起索村抵駱村

縣志

今因河深岸高移渠口於巴家灘



經駱村至蕭郭灣止灌田四百畝縣志石水渠在縣西北二十五

里引漆沮河水溉民田十里長安志

永潤渠 起木節口抵故漏澤園近則水至南關縣志灌田千餘畝

縣志又南為

廣濟渠 起唐家灘抵南吳村灌田一百八十畝又南為

永豐渠 起許家河至賈家堡灌田三百畝又南為

溢水渠 起劉家灘至澗裡劉家堡灌田二百五十畝又南為

遺愛渠 起安家灘經流永潤等堡灌田四百畝又南為

千年渠 起毓秀堡抵聖佛寺灌田三百五十畝縣志河水又自南

而東流為

陽九渠 陽渠在縣西南二十八里引漆沮水溉民田十五里長安志

志陽九渠一名廣惠渠縣志渠即宋敏求長安志之陽渠也自趙



氏河入漆沮處開渠至牛村止縣志灌田一千二百畝遇雨澤時

降則引石川河水旱則由金定渠築堰借引趙氏河水此石川

東濱之灌田者縣志其由西濱而南者最北曰

偃武渠 起梁家泉灌至廟溝縣志偃武渠在縣西北四十五里義

林鄉來自華原縣流經縣界溉民田八里長安志今灌田一百三

五十畝縣志又南為

中渠 起岔口灌至寶峰寺縣志石川諸渠旱甚則流亦微細惟偃

武中渠長流不竭以兼引梁家泉水故也中渠灌田一百二十

畝又南為

小白馬渠 起岔口灌至南灣縣志今又續開至陵里溝灌田三百

十畝縣志又南為

白馬渠 起山南五里舖灌田至鐵佛寺縣志今又續開至十八坊



之赤兔坡灌田一千四百畝縣志白馬渠在縣西北四十里

鄉信義村引漆沮水溉民田十五里長安志又南為

永興渠 起洪水鎮灌田至上官村縣志今因岸高河深移於蒙家

灘開渠經流上官村至南吳堡止灌田二百畝縣志

洞子渠 起十八坊灌鐵佛寺田縣志今十八坊赤兔坡續開白馬

渠因移洞子渠口於金臺堡經流澗里至董家堡止灌田五百

畝又南為

河西廣濟渠 起侯家灘至西閭村灌田六百畝雍正三年新開

縣志又南為

永壽渠 起西閭村至官莊里縣志今因西閭村新開廣濟渠乃移

永壽渠口於覓子鎮灌田七百畝縣志又南為

長澤渠 起姚一坊灌至盤龍寺縣志灌田六百畝縣志長澤渠在縣



西北三十里義林鄉西陽村引漆沮水溉田十五里

長安志○按長安志

引漆沮河者有高望渠在縣西北二十五里閭村溉田三里今縣境無此渠名以地度之應在今廣濟永壽二渠間又長安圖說載石川東岸渠七判官楊家文相永濟石水閭渠陽九也西岸渠六偃武白馬長澤西長澤東高望楊陵渠也今判官永濟石水陽九偃武白馬長澤仍前名餘異

金定渠

在縣西十里引趙氏河水經流堡裡村西渠村灌田千

餘畝

縣冊

渠起盤龍灣抵義城石川深二丈五尺濶一丈八尺長

二十餘里又築堰為障水計長十二丈底濶一丈五尺頂濶八

尺邑侯劉公兌開

喬因阜撰金定渠記

直城渠

在縣西十五里

縣圖

引溫泉水一名簿臺河

長安志渠圖

邑水

灌田次者溫泉河也泉東流與澤多泉合未合時引泉水歷南

岍灌齊堡村者為直城渠

縣志

渠自溫泉起抵縣西北城壕灌田

二百餘畝

縣冊

直城渠在縣西南二十里溉民田二十里

長安志



泉水既與澤多泉合由北岸引以灌田者為

懷德渠

縣志

渠自齊堡村起經縣城北門外又東經竇村北至華家

洞南竇村灌田二千二百畝今下流稍淤

縣冊

懷德渠支分為

順城渠即玉帶渠

縣圖

渠先起老堰止焦村傍河易崩損知縣劉兌

分懷德渠水由溫泉石橋槽而南至于縣隍更渠名玉帶民甚

便之

縣志

玉帶渠分懷德渠水橫穿溫泉河而南至縣北門外經

流竇村灌田一百五十畝又東為

國田渠

自縣東華家堡開渠經流平觀村定國寺至趙家灣止

灌田一千八百畝

縣冊。按縣志引溫泉河者有普濟渠乃隆慶時邑人穿山灌南郭田者卒不就

順陽渠

在縣東北頻山下引東河水

縣圖

東河西河即頻山之東

西岔溝也山後為同官界地勢甚高諸山之水皆自頻山下注

澍雨驟降合同官高阜之水悉趨頻山分東西二河東河自趙



老峪出分爲二派東曰順陽渠灌兩門村磐石村城西村美原

堡田六百畝冊西曰

薛家渠 南灌薛家溝東灌仁義坊莊子鎮五家坊西灌蓋村將

軍村道賢村惠店荆家村東李村流曲堡丈八村縣志今渠口猶

存而各村堡支分小渠大半圯廢利益無多冊西河出山南流

其在河東者爲

孫家渠 弘治間開濬灌小惠村田縣志昔時灌田三千五百畝今

上流壅塞所灌甚微冊其在河西者爲

朝陽渠 灌鄒村田縣志昔時灌田三百五十餘畝近因大雨衝決

洞口坍塌灌溉無幾冊

古渠鄭渠在縣北自三原縣流入又東入蒲城縣界古渠○北

白渠大統十六年涇州刺史賀蘭祥脩富平堰開渠引水東注



於洛

周書文  
帝本紀

在縣南二十里來自三原溉富平脾陽大澤豐

三鄉民田四十里有斗門十五所其水東入漆沮河

長安志

三鄉

今皆撥屬三原

長安圖說

○龍門堰在縣南二十里○石川堰在縣

南二十里○常平堰在縣東南二十五里

長安志

今廢

縣志

○冠萊

公渠在縣東南又南入臨潼界渠在張閭良村經華陽張橋灌

渭南田有故跡世傳萊公脩者

縣志

○潼河在縣北三尺嶺北說

者謂導潼河水而南由趙老峪出借順薛二渠灌山前田歲可

一二千頃潦不灌時引水令歷蓋村而西從河故道至於後坡

旱潦無恐其在此乎

縣志

明時知縣時泰議疏鑿未成而罷

賈志

醴泉縣

龍洞渠

在縣東北六十里

縣圖

醴泉本漢谷口治所在涇水西今

猶有田在於涇東與其灌溉夫役不及宋脩石渠六縣夫亦無



醴泉

長安圖說

白渠灌醴泉仁義等里田

府志

醴泉在渠上游所溉之

田甚少

涇陽志

今分涇陽王屋一二三四斗內水與涇陽共灌現

灌本縣田三千三百九十畝

縣志

古渠堰附

安谷水在縣北二十里明嘉靖四年谷中出水居民引流

灌田。巴谷水在縣北八十里經昭陵右灌田數十頃萬曆間

邑人趙云璧創一渠其利更溥

縣志今廢

。岷峪河在縣南可

資灌

賈志

。觀音泉在縣東北與巴谷水合流溉田

縣志

今無灌

溉利

縣志

延安府膚施縣

延利渠

在縣南二里安司馬光為麟州通判鑿引入城

賈志。按此渠

一云宋龐籍知延州時所開

支分清淺流縱橫貫城市

司馬光知龐籍詩

渠久廢今

城南石洞中猶鑿延利渠三字雍正十年重修渠首在花石崖



下引杏子河水鑿石渠七十八丈五尺土渠三里餘經流沙梁

南寺灌田數百畝

縣冊

按延安萬山環列地氣頗寒諸水凭高而來雨則奔衝旱即枯涸故修渠築堰視他郡較難然賈志載安塞之延洛諸水及安定之潘陵黑牛諸川俱云可資灌漑而府志亦言延安流水可以灌田而民惰於疏濬則延郡之水利未興亦不得盡諉於地也踵事經營其惠濟之大端歟







